

Basef Ifimba Pol Nanda'ef Fagafe'ma Esis Romi

Basef bandafi Pol nanda'ef fagafe'ma esis Romi

1:1-17 Basef fagali'i Pol nanifela Goda esis Rom sagahapifanai

1:18-3:20 Okom wandafunai Godi mapoma epes hiasi hi'alas, esis
Juda saloma esis owa' Judaisia wapani

3:21-4:25 Epes mamahisa sagahapifa Jisas Kraisi, God nofalas na'i
epes isimba be'es hilili'i

5:1-8:39 Apa' epes mamahepama magahapifanai mape opaf atotof
maloma God mape mandagala maga' maloma Kraisi ea' mosafel
wapani malomana mape namepa Ambal ananinai

9:1-11:36 God nihimba'mapa okom ananiami atom nandandepa epes
mamahisa anen okom maga'iasi ea' na'ipapa anif basefa esis Israel
anaf sope si'imama

12:1-15:13 Waf apa' Kristeni

15:14-16:27 Pol na'i basef akutaifi ea' na'i basefa dagala ananini
wapani nafe'ma esis Kristen sagape Romi

Basef kofagefa Pol naga'ipa esis Roma maol aposel anen nanda'ani

1 ¹Ae' Pol ape lafela Kraisi Jisas anda' maola anen atona. God nofale
ma enda' maol aposel ea' nosahe'e ma egawalapa basef bu'wafi
ananifi.^a

²⁻⁴Basef ifimba fagape na'amba. Fowa' gani God nala' lapa basef ifimba
bu'wafi ea' na'ipa amom profet ananiami mawalipasef manda'ef fail buk
Godi. Basef ifimba fa'i Nogamana ananinai, Jisas Kraisi dembinai ape'inai.
Ea' nofa' alop apa' epesi nataga wambota aman dembinai king Deviti.
Apa' dei' Ambal bu'unai Godi nawalapana alihina ma banagami Godi,
anen Nogamana ananinai endilisi. Ambal anamba nasa'mana nogosafel

a 1:1 Ro 16:25-26; Ta 1:2; Mt 22:42; Ro 9:5,15; 2 Ti 2:8; Ap 13:2,33; Ga 1:15

wandof wapani.^b ⁵Lagof Jisasi atogof God natopalope dowaf nowa' banagae anda' maol aposela asa'ma agol Jisas Kraisi lu'wagol. Anen nanda'as na'amba ma anaf anis amam nematawa misi'ah hiasi hi'ilas sohapifana sogaila basef ananifi. ⁶Ipa' wapani pape mini'ap apamba. Ipa' pame' fala Jisas Kraisi ea' pailana pape ananipai.^c

⁷Ipa' epes Romipai, God okom maimailipa nofalepa ma pagape amam nematawa ananipai atipa. Ae' anda' basef ifimba fafi'mipai. Ae' a'i God ahamapa ape'inai noloma Dembinai ape'inai Jisas Kraiis motopalopepa dowaf mowa' banaga opalef ipe'ilifi fepe sa'ombel.^d

Pol na'i niti esis Rom

⁸Ae' a'i ata' ili' igaliesi isimba. Ae' anifela God ae'anai ma agol Jisas Kraisi, anifelona ma ipa' wapani. Dei' main, esis itap ganimba hiagoma sa'i basef ifimba ma ipa' pagahapifana.^e ⁹⁻¹⁰God nogawa nemaf mamahefa andabetenafi okom ae'ami mandanda' ma ipa' anda'mepa beten. Ae' anda' maol Godi aloma okom ae'ami si'ima agawalipasa basef bu'wafi ma Nogamana ananinai. Beten ae'ani nagape na'amba. Fowa' dondol nimaguf hiafi ahali'ana ma efo'o igatilipa. Owa', owa'atin. Dei' wapani ahali'ana ma anen ni'i awiai, nonda'me ano'w ufia'wa efo'o igatilipa.

¹¹Ae' okom ma'i a'owa' ma atiasi efo'o igatilipa ma ewa' banagaepa egase'epa anis hiahaom fasimi Spirit Ambal Godi nogase'epam dowafi. ¹²Amamba na'amba. Ae' a'i hapif ae'ani netopalopa ipa' ea' ipe'ini netopalopa ae' newa' banagae. Isimba sowa' banaga opalef ape'ilifi na'amba atin.^f

¹³Ae' a'i ipa' alipipai ata' pegawa nimaguf hiafi ae' a'i efe'mago ipa' ea' afi'i ataga dei'. Owa' anis hiahawes sasopama ufia'wa ae'. Fowa' atopalopa anis sogololama Godi sataga Kristen salutu banages. Ea' dei' a'i ata' etopalopepa si'i agatopalopa esis. ¹⁴Ae' wiaf fotaome ma egatopalopa epes hiasi Kraiis. Wiaf afamba na'amba. Kraiis natalowe maol lu'wani dei' ae' egwamanan etopalopa epes isimba hiasi hi'ilas. Ma sogogawa waf bu'wafi dambaifii soloma isimba sogololama waf dambaifii, epes gawaisi soloma isimba owa' gawaisia wapani. ¹⁵Isimba atis dei' opaf ae'afi fosafel endilisi ma egawalapa basef bu'wafi Godi ma ipa' epes Romipai wapani.^g

Basef bu'wami Godi, amamba banagami ananimi

¹⁶Ae' ina ombal mahe ambal aola egawalipasa basef bu'wami Godi, owa'atin. Ae' ahapifa basef amamba bu'wami banagewe a'owa'. Dei' main, amamba banagami Godi mofa' epes mamahisa sagahapifanai

b 1:2-4 Ap 26:16-18; Ro 15:18; Ga 2:7-9 **c** 1:6 Nam 6:25-26; 1 Ko 1:2; 2 Ko 1:1; Ef 1:2
d 1:7 1 Te 1:8 **e** 1:8 Ef 1:16; Fl 1:8; 1 Te 2:5,10; Ap 19:21; Ro 15:23,32 **f** 1:12 Ap 19:21;
 Jo 15:16 **g** 1:15 Sam 119:46; Mk 8:38; 1 Ko 1:18-24; Ap 13:46

sogotanimai. Esis Juda sahapifi sali' ipa' hipai owa' Judaipaia pagi'.^h ¹⁷Dei' main, basef amamba bu'wami Godi mihimba'mepa waf usi'ifi ananifi. Afamba na'amba. I'i apa' mohapifa Jisas banagepa atapipa, God ni'i apa' be'epa hilili'i. Ina ano'w ufia'w daia'wa apa' mogataga be'epa hilili' ma nogohnaep ananisi, owa'atin. Hapif atin. Ufia'w si'i Baibel na'ias naga'i, "Epen ami nigahapifa Godi, anen ni'i anin bu'wani hilili'i ea' nepe namin atapin dondol."ⁱ

Esis hiasi sowa' alafugaha God

¹⁸Dei' a' anaf owagama wapani okom numbutinai Godi nifi'i heven notaga nondawalap atapina ma waf hiafi awafi epes sanda'afi hi'ilaf. Anen nogwamasa akafimi awami ma epes isimba hiasi sogowa' alafugaha waf bu'wafi ananifi sanda' waf awafii dei' sagataloga basef endilisifi ananifi.^j ¹⁹Dei' main, waf hiafi Godi ina fandambaho', owa'atin. Waf mamahefa dondo' ma gawa epesi God a' nihimba'masaf fataga alihif fandawalapa.^k ²⁰Fowa' dambadamba God nanda' hiahaom hiami nogota atamba tafi'i tataga dei', esis sati hiahaom anen nanda'ami. Hiahaom amamba esis ilama sogogawa ma anef waf hiafi Godi esis owa' la'ifisa sogatelef naepia. Isimba na'amba. Esis satelef endilisi waf Godi kofagefa, anen dembinai nikila' amom dembami hiami magape itapi hi'alam. Esis sati waf afamba faloma banagami lu'wami ananiami magape lililafi dondoli. Ea' isimba atis dei' esis ina ano'w ufia'wa sondahali' sombaho' waf awafi asasifi soga'i, "Ae' owa' egawaea." Owa'atin.^l

²¹Esis sogawa God nape, apa' esis ina sogawa sa'i anen bu'unai endilisi ma sofela agol ananigili lu'wagol a'a soganifelona, owa'atin. Ukup asasimi mandapoma hiahaom falafalafumi atom ea' nelelemb asasimi ina mataga andeande', owa'. Mataga akutim awasim a'owa'.^m ²²Esis aligah maso'as sa'ias sa'i, "Apa' mogogawai," apa' owa' esis sataga ukup mahamahasa waf bu'wafi.ⁿ ²³Ea' saso'ana alafugah God owa' nogaga'ia, ina sanda' lotumana sanifelona, owa'atin. Sandomba lawah otamba maim falafumi atom mataga god baso'amunai mandati si'i amiguf, mafis uguf maim maloma epes owa' sogape namis atapisia, ea' sanda' lotumam sanifelom.

Waf naninani aunai^o

²⁴Esis sandaiwa'ma God sowa' alafugahana. Isimba atis dei' anen nakwaha esis ea' ukup asasipi pehafel banagambel pahokolas sanda' waf hiafi alugufi. Sanda so'a waolaf sahambombaga alop asasipi.^p ²⁵Dei'

h 1:16 Ro 3:21-22; Hab 2:4 **i** 1:17 Ef 5:6; Kl 3:6; 2 Te 2:12 **j** 1:18 Ap 14:15-17; Ap 17:24-28 **k** 1:19 Jop 12:7-9; Sam 19:1; Hi 11:3 **l** 1:20 Ef 4:17-18 **m** 1:21 Jer 10:14; 1 Ko 1:20
n 1:22 Diu 4:15-19; Sam 106:20 **o** 1:23 Ap 14:16 **p** 1:24 Jer 13:25; Jer 16:19; Ro 9:5

main, esis ukup paso'asa basef Godi endilisifi a sagi'ma basef baso'ami atom maho'ofa basef endilisifi ananifi. Ea' sanda' lotuma hiahaom amamba God nanda'ami, apa' anen, sosambalona. God anen bu'unai kofagonama hiahaom amamba hiami, apa' mondasa'ma agol ananigili lu'wagol lifilafi endilisi.⁷

²⁶⁻²⁷Ea' God nakwaha esis saila ukup epesi atipa sanda' waf awafi ambagof awagufafi. Sanda' waf afamba awafi faha'ofa waf daso'amaifi. Nematawa waila waf ikiakafi waloma anowa daiawa. Anom amam wapani manda'am na'amba atin. Ukup amamipi pehafel a'owa' pa'ipa'i amam daiam ama molomam monda' waf awafi. Ea' waf afambai fahambombaga ukup paloma alop amamisi dindi'i dondo' fagwa waf awafi amamifi.

²⁸Ukup asasipi atip pandaiwa'ma sogahapifa God nomonas asasisi. Isimba atis dei' nape natitilis saila nomonas awami asasimi atoma sanda' waf naninani aunai owa' andeande'ma epes sonda'anaia. ²⁹⁻³⁰Esis sanda' waf hiafi fafifafi awafi fape si'ifa esis. Ukup pehafel pa'ipa'i sogofa' hiahaom hiami ma esis atis. Waf awafi agufifa afamba. Ukup kowagalepa hiahaom bu'wami awami, ukup numbutipa sogaha anis, saha anis daias sagaga', migimigah sambaso'ama sogofa' anom hiahaom anin epeni dowadowafa, ea' sanda' maola sagahambombaga epes. Waf anamba aunai asi'ina endilisi ma esis. Ea' sanda'i'ipamas sa'i basef sawalapefa sogola'asa agof anis daiasi ma nogohnaep epes hiasii. Esis sataga bousi saloma God, gikal sa'oh sa'i digah lu'wami atom, sola'asa basef banagafi sagasa'ma agof asasigufi atogof. Ukup pandanda' ma waf naninani aunai dambainai. Ea' sosambala basef mamasasi. ³¹Esis sololama gawa bu'wani ma waf bu'wafi ea' sa'i basef andeande', apa' ina saila basef fimba asasifi datima, owa'. Esis ina ukup paipaila anis daias satilis uwahipis, owa'atin. ³²Basefa mu'uli Godi usi'ini na'amba na'i, "Epes sanda' waf na'ambainai esis a' sondaga'." Epes isimba sogawa mu'uli inimba, apa' owa'atin. Sandanda' waf afamba awafi atef. Apa' ina sanda'af dowadowaf, owa'atin. Sasa'ma agofa anis daias sanda' waf awafi na'ambai sandagalas.

Basefa kot God anaf nonda'masafi fefe' usi'if atef a'owa'

2 ¹Ipa' mamahipama pa'i basef pagawaloga anis daiasi, atiasi kofagema ipe'imi atom. Peme', ipa' pa'i basef pagawaloga anis epes daiasi, waf afambai ipa' pandawaloga ipa' atipa. Dei' main, isimba ipa' pa'i basef pagawalogasi, ina' sanda' waf awafii.^r ²Apa' mogawa God nonda' kotima epes sanda' waf afambai awafi ma basef usi'ifi atef. ³Apa' epen ina' nagasapaga anis epes deideiasi sanda' waf fafifafi na'ambaifii, epen ina' nanda' waf afambaii. Dei' ina' okom mandanda' ma'imama?

¶ 1:25 Lev 18:22; Lev 20:13; 1 Ko 6:9 ¶ 2:1 Mt 7:1-2; Jo 8:7

Ina' atiasi la'ifinama nindihi'ama basef God nonda' kotimasafi nefa' negafe'? Owa'atin endilisi.^s ⁴ God nanda'ena andeande' a'owa', ea' ata' nape nasasaena nogota lautai, ina nagwamena waf awafi nase'ena akafimi kwafalis, owa'atin. Waf afamba bu'wafi Godi ina' okom mandanda'maf na'i falafifi? Anen nanda'mena waf afamba bu'wafi ma ata' negambema nembel. A'i ina' negawaf a'a owa'? ⁵ Ina' nanda' du'wanigai ea' dei' ina ata' nembema nembel, owa'. Ina' natama akafimi lu'wami nikikama ina' atina. Ama nemaf okom numbutinai Godi notaga alihina ma kota, nogowaloga epes hiasi ma basef usi'ifi banagafi ananifi.^t ⁶ Nemaf afamba anen nowalogamasa waf epesi atona atin, nogwamasaf fendahama waf esis sanda'afi.^u ⁷ Anis sagape banages atapisa waf bu'wafi sanda' maol solaoma ufa'wa sogofa' agof lu'wagufi, sigati mogogala'i ma sogape andeande' lifilafi. ⁸ Apa' anis ukup pandapoma esis atis ea' sowa' alafugaha basef endilisifi saila waf ikiakafi. Epes isimba anaf God okom numbutina a'owa' nindaiwa'masa waf awafi asasifi.^v

⁹ Nimanimi lu'wami moloma akafimi anaf mupai' epes isimba hiasi sanda' waf awafii hi'ilas. Esis Juda sili' ea' isimba owa' Judaisia wapani sigi' solomas ¹⁰ Apa' God anaf noso'asa poe bu'wani ma mogogala'i agof lu'wagufi foloma opalef awanilifi epes isimba hiasi sanda' waf fasifii. Esis Juda sili' ea' isimba owa' Judaisia sigi'.^w ¹¹ Dei' main, anen nowaloga epes hiasi ma ikwaf usi'ifi atef.

¹² Anen okom mandanda' na'amba. Epes mamahisa sogololama mu'uli God nagaso' Mosesani sanda' waf awafii, anaf a' higililas. Apa' epes Juda sogogawa mu'uli inimba ea' ma dei' sanda' waf awafii, anaf nowalogasa mu'uli inimba atin.^x ¹³ Ina epes isimba sagine' mu'uli dowadowafi sataga bo'wes hilili'ma naep Godi, owa'atin. Epes mamahisa same' basefa sagaila mu'ulii, isimba atis anaf God ni'i esis bo'wes hilili'i.^y

¹⁴ Esis isimba sogololama Godi, waf asasifi na'amba. Esis mu'uli akas, apa' nemaf mamahefa sagaila malogofa nomon nelelemb asasimi, waf afamba a' fataga si'i mu'uli asasimi. Esis mu'uli Godi akas, apa' endilisi sailana waf afamba ma nelelemb asasimi. ¹⁵ Waf afamba asasifi fihimba'mapa basefa mu'uli inimba fagape ukup asasipi. Ea' malogof fagape opalef asasimi nomoni, amamba wapani mihimba'mapa na'amba atin. Dei' main, ukup asasipi pa'ias pihimba'mas alihif na'amba. Anif nimaguf panda' kotimasa waf awafi, apa' anif nimaguf andeande' dondo'ma waf esis sanda'afi.^z ¹⁶ Amamba anaf motaga na'amba atina nemaf afamba God nogawaloga waf hiafi epesi. Afamba anen ni'i ila ma Jisas Krai nope dembinai nogawaloga waf hiafi asasifi fandambahi'i

^s 2:3 Ef 1:7, 2:9; 2 Pi 3:15 ^t 2:5 Mt 16:27; Jo 5:29; 2 Ko 5:10 ^u 2:6 2 Te 1:8 ^v 2:8 Ro 1:16 ^w 2:10 Ef 6:9; 1 Pi 1:17 ^x 2:12 Mt 7:21; 1 Jo 3:7 ^y 2:13 Ap 10:35 ^z 2:15 2 Ti 2:8

feloma basef sa'if sagambaho'afi. Basef bu'wafi God ae' agawalapafi ifimba atif.^a

**Esis Juda sahapifa mu'uli inimba God nagaso' Mosesani
atin sa'i mu'uli inimba atiasi a' netopalopas**

¹⁷Ipa' pendefala pa'i ipa' Juda pagahipifa mu'uli inimba fowa' God nagaso' Mosesani sisihina negatopalopepa pindihi'ama okom wandafumi Godi. Ea' ipa' pandasa'ma agof ipe'igufi panda'i, "Apa' mogawa God endilisinai." ¹⁸Ea' ipa' pegawa okom God na'i pigagi'mami ma pegelafa waf mu'uli inimba ma ukup pi'i waf usi'ifi pigailaf. ¹⁹Ipa' pegawa pa'i ipa' epes pepegawa basef Godi ma pigasindi'amona epes isimba naep pagaso'asi ea' pape si'i nagwapina epes isimba sagape akoti ma pigihimba'mas.^b

²⁰Ipa' epes gawaipai pagawalipa isimba gawa akasi saloma anis daias sogololama basef Godii sagape si'i awasi ata' sa'wisi. Dei' main, ipa' pegawa pa'i basef endilisifi hiafi faloma gawa hiani hi'alas sape mu'uli inimba pelafan pepegawani.^c

²¹Basef ifimba atif hiafi fagali'i dei' fitanima fila ipa'. Ipa' pandawalipa anis epes daias, apa' ipa' owa' ata' pili' piwalipa ipa' atipaia? Ipa' pawalipasa basef anis pa'i, "Ipa' ina a' penda' wal, owa'i", apa' ae' a'i ipa' wapani panda' wali? ²²Ipa' pawalipasa basef anis pa'i, "Ipa' ina a' pehambombaga waf daso'amaifi, owa'i." Apa' owa' ipa' wapani panda' waf afambai awafi? Ipa' pandaiwa'ma god baso'amunai, apa' owa' apakwalopa hiahawes saga'oh ifagw epes sanda' lotuma god amamba baso'amii?

Na'ambai ina andeande', owa'. ²³Ipa' pandasa'ma agof ipe'igufi atogof lu'wagof panda'i, "Apa' mogogawa mu'uli Godii nagaso' Mosesanii." Apa' owa' ipa' pimbisila' mu'uli inimba panda' waf afambai atef dei' pahambombaga agol Godi.^d ²⁴Waf ipe'ifi awef si'i basef fagail buki fa'ias faga'i, "Kofagema ea' ipa' Judai atom, dei' esis owa' Judaisia sogololama Godi sa'i basef sanda' agol Godi findiwagol."^e

**Waf sogatopa' alopafi ina fatopalopa epes, owa'!
Sogahapifa God atona dao', sotaga dambais.**

²⁵Endilisi, i'i ipa' Juda pihapila mu'uli inimba God nagaso' Mosesani pilan endilisi, dao' waf afamba magatopa' alopafi bu'wafi. Apa' i'i ipa' pegawala mu'uli inimba, atiasi a' pelelama God petaga na'amba atin si'i ipa' owa' pegatopa' alopia.^f ²⁶Epes isimba owa' Judaisi sogatopa'mas alopia, esis sagape na'amba. I'i esis sila waf afamba hiafi usi'ifi ma

a 2:16 Je 2:19 **b** 2:19 2 Ti 3:5,15; Mt 15:14; Lu 18:9 **c** 2:20 Sam 50:16-21; Mt 23:3-4

d 2:23 Ais 52:5; Esi 36:20 **e** 2:24 Jer 4:4, 9:25 **f** 2:25 Ga 5:6

mu'uli inimba, atiasi sotaga si'i isimba sagatopa'mas alopi ma naep Godi. ²⁷Endilisi, esis owa' Judaisia atiasi sola' basef mila ipa' Juda. Dei' main, ipa' pegawa mu'uli God nagaso' Mosesani nagape buki ea' patopa' alop ipe'ipi, apa' owa' ipa' pimbisila' basefa mu'uli inimba. Apa' esis isimba owa' Judaisi sogatopa' alopia saila basefa mu'uli inimba.^g

²⁸I'i ipa' epes Juda dowadowaf, ipa' ina Juda endilisipai, owa'. Ea' waf afamba sagatopa' alopafi ina waf alop atop si'ipi, owa'atin.^h ²⁹Ipa' epes hipai Juda. I'i opalef ipe'ilifi fetaga dambailif, ipa' Juda endilisi. Waf sagatopa' alopafi, God nanda'af opalef ipe'ilifi nomon. Maol inimba ina natagama basefa mu'uli nagail buki, owa'. Ambal bu'unai Ananinai atona nanda'an. Epen ami nenda'as na'ambai, anin agol akana nogohnaep epesi, owa'atin. Anin agol lu'wagola naep Godi atip.

Waf awafi ina la'ififa figikila' waf bu'wafi, owa'

3 ¹Dei' esis Juda sikila' anis daias owa' Judaisia ma waf maif bu'wafi? Waf bu'wafi maif fatagama waf afamba magatopa' alopafi?ⁱ ²Awasi! Waf hiafi fasifi fatagaf. Waf fagali'i afamba. God nali' naso'asa basef ananifi endilisifi atif esis Juda ma sugumafif.^j ³Endilisi, anis ina sahapifa basef ifimba andeande'. Owa' dei' ata' si'i main? A'i waf afamba awasifi asasifi atiasi fenda' God nokwaha basef endilisifi ananifi?^k ⁴Owa'atin endilisi. Apa' mi'i basef monda'i, epes hiasi sagambaso'ami, apa' God atotona naga'i basef endilisi dondoli, nanda' maol datimai si'i Baibel naga'i,

“Atiasi epes amam nematawa hiasi seme' basef ine'ifi si'i endilisifi atif. Nema'af afamba esis si'i sonda' kotimina, ina God atiasi nepa'agas nikila'as.”

⁵⁻⁶Dei' i'ipipa anif basef apa' epes ukup paga'iefi. Basef ifimba na'amba. Dei' ata' mama? I'i waf awafi ape'ifi fawalapai waf usi'ifi Godi fataga alihifai, apa' atiasi mi'ias mi'imama? Mi'i God nanda' waf awafi okom wandafuma nogagwamapa waf awafi ape'ifi? Owa'atin endilisi. I'i God nonda' waf awafiai, dei' anen nowaloga waf amam nematawa hiasi ma main? Owa'atin endilisi. ⁷Apa' anis epes ukup pandanda' dowaf sambaso'am sa'i, “I'i epes hiasi siti waf baso'afi awafi ape'ifi feloma waf Godi endilisifi ma sowalogaf, asogawa waf Godi fikila' waf ape'ifi. Ea' waf ape'ifi fawalapai agol Godi lu'wagol. Apa' na'ambaiai, God ina atiasi nogwamapa waf awafi ape'ifi, owa'atin.” Apa' owa'atin endilisi.^l ⁸I'i apa' mila ukup ipimbai atip, mefe' mefe' mi'i, “Awi, apa' a' monda' waf awafi ma mugawalapai waf bu'wafi Godi.”

g 2:27 Jo 7:24, 8:39 h 2:28 Diu 30:6; Kl 2:11; 1 Ko 4:5; 2 Ko 10:18 i 3:1 Sam 147:19-20; Ro 9:4 j 3:2 Ro 9:6, 11:29; 2 Ti 2:13 k 3:3 Sam 51:4 l 3:7 Ro 6:1,15

Endilisi, anis epes sambaso'mas sa'i basef findiwaefa ae' sa'i ae' aga'ias na'amba. Apa' owa'atin. Epes isimba saga'i basef ifimbai, anaf God nogwamasa waf awafi asasifi dondo'af atin.^m

Ina anin epen bo'wen hilili' nape, owa'atin

⁹Dei' si'i main? Basef ifimba doko'ifi kofagefa fa'i main? Fa'i apa' Juda mikila' anis daias owa' Judaisia ma waf bu'wafi, a'a owa'? Owa'atin endilisi. Ae' ihimba'mepa basef ea', waf awafi faso'ala apa' hiapai hi'alapa, esis Juda saloma isimba sogololama basef Godi wapani.ⁿ

¹⁰Baibel na'i isimba na'amba na'i,

“Ina anin epen bo'wen hilili' nape, owa'atin endilisi. ¹¹Ina anin epen negawa waf bu'wafi. Ina anin epen nanda' maol nelaoma God, owa'atin. ¹²Epes hiasi sololama ufia'w ea' sataga epes awasis endilisi hi'alas. Aho', owa' anin atitin bo'wena.^o ¹³Malogof asasimi mandahama si'i nowagah kwambifah sagawa epesa mindihianama alihim magape. Esis sa'i basef hiafi baso'afi faloma basef hiafi fafifafi ma sagahasopalo'wa anis epes daias, si'i nombot nagape uguf faha epes sagaga'i.^p ¹⁴Dondol ukup asasipi numbutip a'owa' sa'i basef awami atoma sagaso'as nimanimi anis daias.^q ¹⁵Esis kwafalis atisa sagaha anis daias sagaga'. ¹⁶Dondol sahambombaga epes hiasi saso'asa akafimi nimanimi hiami. ¹⁷Opalef asasilifi ina fape awanelefa sogape opalef atifilif sogaloma anis epes daias, owa'atin.^r ¹⁸Esis ina ukup paipaila God ombal mahasana ma sogaila waf ananifi, owa'atin.”

¹⁹Ea' dei' apa' mogawa basef mamahifa Godi fagape mu'uli anen nagaso' Moses ani fa'i apa' Juda mogape lafelani inimbai mondailan. Owa' ina la'ifipa mailan andeande', owa'. Ea' ina anin epen la'ifina niga'i, “Ae' epen bo'owe hilili'i,”

Owa'atin. Apa' epes hiapai ganimba hiagoma, kofagema mapoma apa' ma naep Godi anaf nogawalogapa.^s ²⁰Dei' main, waf afamba mogaila mu'uli inimba, owa' anin epen atitin atiasi negefa' agol epen bo'wen hilili' ma naep Godia, owa'. Mu'uli inimba nihimba'mapa waf awafi ape'ifi ea'.^t

Epen nagahapifa Kraisi, anin agol gataga epen bu'wani Godi

²¹Apa' dei' waf usi'ifi Godi ea' fataga alihigima fandawalap. Afamba ina fataga fagi'ma waf sanda' maol sa'i sogaila mu'uli fowa' God nagaso' Mosesani, owa'atin. Afamba fataga ano'w ufia'w na'amba. Basef hiafi

m 3:8 Ro 1:18–2:24; Ro 3:23 **n** 3:9 Sam 14:1-3; Sam 53:1-3; Ekl 7:20 **o** 3:12 Sam 5:9, 140:3 **p** 3:13 Sam 10:7 **q** 3:14 Pro 1:16; Ais 59:7-8 **r** 3:17 Sam 36:1 **s** 3:19 Sam 143:2; Ro 7:7; Ga 2:16 **t** 3:20 Ap 10:43

Godi fagail Buki fawalapai waf afamba. Anif fail mu'uli inimba God nagaso' Mosesani ea' anif amom profet hiami manda'afi.^u ²² Waf afamba na'amba. Epen nagahapifa Jisas Kraisi, inimba God nofalan na'i epen bo'wen hilili'i. Ea' apa' epes hiapai mogahapilafi hi'alapa, God nanda'apa na'amba atin, esis Juda saloma isimba owa' Judaisia wapani.^v ²³ Apa' epes hiapai hi'alapa manda' waf awafi mumbisila' mu'uli Godi ea' ina la'ifipama atiasi mogati mogogala'i bu'wami ananiami, owa'atin.^w ²⁴ Apa' owa' God nati apa' uwahipipa, natopalopapa dowaf. Apa' mahapifa Kraisi Jisas ea' God na'i apa' bu'upai. Apa' ina maso'ana anis maefah matalona, owa'atin. Anen natopalopapa ma Kraisi Jisas ea' natagwahepa natalepa ma mogape wahifipa.^x

²⁵ God nihimba'masana alihina amam nematawa hiasi na'amba. Anen naga' esimbel ananimbeli balo bali'amona okom wandafunai Godi ma bagakwaha waf awafi epes mamahisa sagahapifanai. Ga' Kraisi Jisasi atin dei' God nihimba'mapa waf ananifi usi'ifi hilili'i na'amba. Fowa' nanda' esis amam nematawa sa'ombemas ea' ina nogwamasa waf awafi esis sanda'afi, owa'. ²⁶ Apa' dei' dao', anen nihimba'mapa waf usi'ifi ananifi ea' fataga alihigima ma nogagwamasa waf awafi asasifi. Isimba atis dei' apa' mogawa anen usi'ina hilili' hi'agalanai ma noga'i epes mamahisa sogahapifa Jisasi bo'wes hilili'i.^y

²⁷ Ea' dei' apa' ufiaw akapa ma mogasa'ma agof ape'igufi atogof lu'wagof, owa'atin. Ufiaw akwamba ea' kwaso'. Main da'im mahefa ufiaw akwamba? A'i waf afamba magaila mu'uli God nagaso' Mosesani? Owa'atin endilisi! Waf magahapifa Jisasafi atef fahefa ufiaw akwamba.^z

²⁸ Ea' apa' mogawa epes mamahisa sagahapifa Jisasi atini, God na'i esis atis sataga bo'wes hilili', apa' esis sanda' maola sogaila mu'uli inimbai, owa'atin.^a

²⁹ Dei' mama? A'i God anen Dembinai esis Judai atona? Owa'atin. Anen esis isimba owa' Judaisia wapani.^b ³⁰ Dei' main, God anen ea' anamba atona. Anen na'i basef atifif fafe'ma epes hiasi. Epes ami sogahapifa Kraisi Jisasi, atiasi God ni'i esis isimba bo'wes hilili'i, esis Juda saloma isimba owa' Judaisia wapani.^c ³¹ Isimba atis dei' hapif inimba apa' ina mi'i apa' mapa'aga mu'uli inimba God nagaso' Mosesani, owa'atin endilisi! Apa' mahapifa Kraisi Jisasi dei' mawalapa basef kofagefa ma mu'uli inimba.

God na'i Abraham nahapifana endilisi dei' nataga bo'ona hilili'

4 ¹ Apa' mi'i basefa Abraham akunamapa apa' Judai mi'imama? Anen nanda' maina God naga'i anen bu'unai? ² I'i Abraham a' endilisi ma

^u 3:21 Ro 1:17; Ga 2:16 ^v 3:22 Ro 3:9, 5:2 ^w 3:23 Ro 5:1; Ef 2:8 ^x 3:24 Ef 1:7

^y 3:26 1 Ko 1:31 ^z 3:27 Ga 2:16 ^a 3:28 Ro 10:12 ^b 3:29 Diu 6:4; Ro 4:11-12; Ga 3:20

^c 3:30 Mt 5:17; Ro 8:4

nonda' maol bu'wani ma dei' nagataga aman bo'ona hilili'ai, dao' anen a' nondagala nosa'ma agol ananigili atogol lu'wagol. Apa' naep Godi owa'.^d ³Baibel na'ias na'imama? Naga'ias na'amba na'i, "Abraham nahapifa God ea' okom mandanda'ma hapif inimba na'i anen bo'ona hilili'."^e

⁴Apa' mogawa epes sanda' maoli ma sogofa' hiahawesa maoli, hiahawes isimba ina mi'ias mi'i mogofa'as dowaf si'i preseni, owa'atin. Isimba hiahawes sagatopa' maolasi atis. ⁵Apa' God ina nati maol bu'wani epes sanda'ani ma niga'i esis bu'wasi, owa'atin. Anen nati epen mamahina nagahapifana la'ifinai ma nogofala epes sanda' waf awafii bo'wes hilili'i. Ea' God okom mandanda'ma okom epeni maga'i endilisi atis epen inimbai dei' na'i anin bo'wen hilili'i. ⁶Fowa' Devit wapani nanda' anif basef fail buk Baibela epes mamahisa God natilis naga'i bo'wes hilili'i, isimba a sandagala. Esis ina sanda' maol, owa'. Sahapifana atin dei' na'i esis bo'wes hilili'.^f ⁷Devit nanda' basef ifimba na'i,

"Epes ami God nagakwaha waf awafi asasifi okom magaso'anafi ma nagaofana awami asasimi, epes isimba sonahas. ⁸Epes ami Dembinai owa' okom mopoma waf awafi asasifia, isimba sonahas."^g

⁹Epes isimba Devit na'i sonagahasi, epes isimba sagatopa' alopi atis? Owa'atin. Isimba owa' sogatopa' alopia wapani. Dei' main, doko' ae' a'ipipa Baibel naga'i na'amba na'i, "Abraham nahapifa God, ea' God okom mandanda' ma hapif inimba na'i anen bo'ona hilili'."

¹⁰Dei' Abraham nape si'i maina God okom mapomana naga'i aman bu'unai hilili'i? Anen nali' natopa' alop ea' a'a ata' owa' ata' notopa' alopa? Anen ina dei' natopa' alopa God naga'i anen bo'ona hilili'i, ata' owa'atin.^h ¹¹Fowa' Abraham nali' nahapifa God nofalana epen bu'unai hilili'i. Ama main, nagi' natopa' alop. Waf afamba nagatopa' alopafi anol ametal God nihimba'mana na'amba na'i nemaf afamba ata' owa' notopa' alopa, a' na'i anen aman bu'unai nagahapifa Godi. Isimba atis dei' anen nataga akunama epes hiasi nagahapifa Godi owa' sogatopa' alopia. Esis sahapifa God atin, nofalas epes bu'wasi.ⁱ ¹²Ea' anen akunama epes isimba Juda sagatopa' alopi wapani. Apa' esis ina satopa' alop atop, owa'. Esis sagi'ma bo'wagah Abrahami sahapifa God si'i fowa' anen nagahapifana nogota atamba ata' owa' nogatopa' alopa.^j

Basef God nagala' lapafi ma epes hiasi sagahapifanai

¹³Fowa' gani God na'i basef nala' lap nagaloma Abraham na'i, "Ae' anaf ese'ena itap hiagoma ina' neloma esis bafasena akusena ine'isi wapani."

Apa' Abraham ina naila mu'uli anaf God nogaso' Mosesani ma dei' God nala' lap nalomana naga'ipana basef ifimba, ata' owa'atin. Abraham nali'

^d 4:2 Jen 15:6; Ga 3:6; Je 2:23 ^e 4:3 Ro 11:6 ^f 4:6 Sam 32:1-2 ^g 4:8 Ro 4:3

^h 4:10 Jen 17:10-11 ⁱ 4:11 Mt 3:9 ^j 4:12 Jen 17:4-6; Jen 22:17-18; Ga 3:29

nahapifa God dei' nofalana aman bo'ona hilili'i na'ipana basef ifimba.^k
¹⁴Anif basef fatopalopa ifimba fagali'i na'amba fa'i, I'i epes sagaila mu'uli mamahina Godi ma sofa' hiahaom amamba God nogaso'asamiai atiasi waf afamba mogahapifa Godafi a' fenalo ea' basef ifimba lapafi Godi wapani a' owa' banagefa, ea' owa'atin.^l ¹⁵Dei' main, mu'uli inimba nigihimba'mapa okom numbutimi Godi ma nogaso'as akafimi isimba sogasambala mu'uli inimbai. I'i apa' owa' mila basefa mu'uli inimbaia, God okom wandafuna nopomapa. I'i mu'uli inimba owa'ai, God ina a' ni'i epes sumbisila' mu'uli inimba satopa'an, owa'atin.^m

¹⁶Abraham nahapifa God. Isimba atis dei' God na'ipana basef ifimba lapafi bu'wafi ma apa' mogogawa endilisi God na'ipas basef ifimba wapani na'i apa' hiapai bafapa Abrahami, naso'apaef dowaf si'i presen. Ina naso'asef epes isimba sagaila mu'uli inimba atini, owa'. Epes mamahisa sagahapifa God na'amba atin si'i Abrahami, esis wapani. Anen nali' nahapifa God nataga bafamapa nali' naumb nagali'i ma apa' hiapai mamahepama dei' magi' magahapifa Godi.ⁿ
¹⁷Si'i Baibel naga'i, God fowa' na'ipa Abraham naga'i, "Ae' enda'ena nepe bafama isimba misi'ah epes hiasii."

Abraham anen bafamapa ape'inai ma naep Godi. Anen nahapifa God atona nagaso'asa ambal namili epes sagaga'ii, a nogofala hiahawes hiasi ata' owa' sogatagaia si'i sataga sagape ea'i.^o

¹⁸Abraham ina dei' nati hiahawes isimba God na'ipanas ea' na'i nonda'asi. Apa' owa', anen nahapilif endilisi si'i nagatilis ea'i. Isimba atis dei' nataga "Bafama esis amam nematawa misi'ah hiasi."

Si'i fowa' God na'ias ea' naga'i, "Owagama esis mini'ap wambota ine'isi sogataga na'amba."^p

¹⁹⁻²⁰Abraham hagona ea' felefele'ma afagof 100-pelaiguf alop ananipi a' pala'of si'i nagaga'i. Ea' waulu'mana Sera a' hage'w wapani asa'w ina la'ifi'wa kogola awasi, owa'. Abraham okom mapoma isimba, apa' okom ananiami banagami nogogawa God endilisi ina mowala, owa'atin. Anen nahapifa God banagambela basef God nagala' lapafi ma hiahawes anaf sigi' sogatagai. Hapif atin nanda'ana banagona ea' nafela agol Godi lu'wagol. ²¹Anen nahapifa God endilisi ma nogogawa anen la'ifinai ma nonda'as na'amba si'i fowa' na'i nonda'asa basef ifimba nagala' lapafi.^q ²²Isimba atis dei' God a' okom mapoma hapif ananini ea' na'i, "Anen epen bo'ona hilili'i."

²³Fowa' amom profet manda' basef ifimba fagape Baibeli faga'i na'amba fa'i, "God okom mapoma anen epen bo'ona hilili'i."

k 4:13 Ga 3:18 **l** 4:14 Ro 3:20, 5:13; Ro 7:8 **m** 4:15 Ga 3:7 **n** 4:16 Jen 17:5; Ais 48:13
o 4:17 Hi 11:1; Jen 15:5 **p** 4:18 Jen 17:17 **q** 4:21 Jen 15:6

Amom ina manda' basef ifimba ma Abraham atona, owa'atin.^r
²⁴Manda'efa apa' wapani. Apa' mahapifa God nasa'ma Jisas dembinai ape'inai nogosafel matmati. Isimba atis atiasi God okom mondanda'ma hapif ape'ini a' ni'i apa' be'epa hilili'i.^s ²⁵God nasapa' Jisas nafi'i naga'ma nagakwaha waf awafi ape'ifi. Ea' nasa'mana matmata noga'i apa' amam nematawa be'epa hilili'i.

God na'i apa' amam nematawa be'epa hilili'i

5 ¹Basef kofagefa fape fagali'i ifimba, hapif ape'ini atin dei' God nofalapa epes be'epa hilili'i. Isimba atis dei' Dembinai ape'inai Jisas Krais nanda'apa mape opalef atelef awanelef maloma God.^t ²Anen atona ufia'wa apa' mahapifana mogape nomona okom Godi magamagaila apa' a'owa'i, natopalopapa dowaf nambemapai dei' magape andeande'mami. Apa' mogawa endilisi mape mohafa anaf God nofa'apa mope molomana mugati mogogala'i ananiami. Hapif inimba nanda'apa sonahapa ma amamba.^u ³Apa' ina sonahapama amamba atom, owa'atin. Apa' sonahapama nimaniami mogatagapama wapani. Dei' main, apa' mogawa mofa'ama mogowa' banagapa wapani. ⁴I'i apa' mulutu banagepama gwamba, God niga'i aho'mapai. Isimba atis dei' apa' mogawa endilisi anen nigaila basef ananifi datimai ma notopalopapa mope mogohafa' mogogala'i banagami ananiami anaf mogatagai.^v ⁵I'i apa' mogawa endilisi na'amba, gawa ape'ini ina atiasi nenalo, owa'. Dei' main, God naso'apa Ambal bu'unai Ananinai ea' waf okom magamagailapafi fape lu'ufa opalef ape'ilifi.

⁶Fowa' apa' ina banagepa ma monda' waf bu'wafi, owa', nogota atamba God nandandepata ea'i, Krais naga'ma apa' mogowa' alafugaha Godi. ⁷Ipa' ukup pandanda' pa'imama? Anin epen na'i nega'ma negatopalopa epen ami na'i nigaila mu'uli Godi, a'a owa'? A'i atiasi ina anis si'i aho', owa'atin. Apa' i'i anin epen bo'wen hilili'i, dao' anin ila ma nega' negatopalopa epen inimba bu'wani.^w ⁸Apa' ata' manda' waf awafi atin, Krais naga' natopalopapa. Ea' dei' God nihimba'mapa okom lu'unai naganagaila ape'i nandawalap. Krais a nikila' epen inimba bo'wen hilili'i naga' natopalopapa.^x

⁹Anen naga' esimbel ananimbeli balo dei' God nofalapa amam nematawa be'epa hilili'i. Isimba atis dei' apa' a' mogawa endilisi atis Krais natagwahepa ma okom wandafunai Godi.^y ¹⁰Fowa' apa' ata' mape boupai Godi, owa' dei' nanda'apa mataga alipipai ananipai opalef atifilif malomana. Anen nanda'as na'amba ma Nogamana ananinai nagaga'ma

^r 4:23 Ro 15:4; 1 Pi 1:21 ^s 4:24 Ais 53:4-5; 1 Ko 15:17 ^t 5:1 Ro 3:24,28, 4:24; Ef 2:18, 3:12 ^u 5:2 Je 1:2-3; 1 Pi 1:5-7 ^v 5:4 Sam 22:5, 25:20; Hi 6:18-19 ^w 5:7 Jo 3:16; 1 Jo 4:10 ^x 5:8 Ro 1:18, 2:5,8 ^y 5:9 Ro 8:7-8

apa'. Isimba atis dei' apa' mape alipipai Godi mogawa endilisi Krai nape namona ma dei' motanima molomana sisihipa mogape. ¹¹ Apa' ina isimba atis, owa'. Apa' mondagala ma God. Dei' main? Fowa' apa' boupai ma anen apa' dei' Dembinai ape'inai Jisas Krai nali'amona naumbih ape'imi nanda'apa mataga alipipai malomana. Ea' dei' sonahapama anen.^z

Adam nawalapai ga', apa' Jisas nawalapa ambal namili

¹² Apa' mogawa isimba. Aman atotona nali' nanda' waf awafi, dei' waf awafi fape nelelemb amam nematawa itapasi. Ea' dei' waf awafi fahokolai ga' nafi'i, dei' ga' nefa' epes hiasi hi'alas saga'. Dei' main, epes hiasi ea' sanda' waf awafi hi'alas.^a ¹³ Fowa' gani nogota atamba God ata' owa' noso'anai mu'uli ananini Mosesa, waf awafi fali' fataga fape itap ana'e. Apa' i'i basefa mu'uli inimba owa'atinai, dei' God ina a' nowaloga epesa waf awafi asasifi, owa'atin.^b ¹⁴ Apa' ga' nataga nape nogota atamba Adami nafi'i nataga nogota Mosesi. Epes isimba hiasi ina sogawa mu'uli God nagaso' Mosesani, owa'atin. Apa' owa' ga' nahapilas sisihi hi'alas. Fowa' God naso'ana mu'uli ananini Adam, owa' Adam natolapan. Anis epes daias ina sumbisila'an si'i Adam nagatolapan, owa'. Apa' ga' nahapilas wapani. Aman anamba Adam nondola'waifa aman anamba Dembinai atona nigil' nogatagai.

¹⁵ Waf God nagatopalopapa dowafafi ma Jisas Kraisi faloma waf awafi Adam nanda'afi, ina na'amba atin, owa'atin endilisi. Aman anamba Adam atotona nanda' waf awafi, dei' nanda' epes hiasi saga'. Apa' God nagatopalopapa dowafi, amamba mataga lu'um a'owa' ma aman atotona Jisas Krai. Ea' apa' dei' mofa' hiahawes isimba presen Godi nikila' ga' inimba ea' nataga lu'una a'owa' ma nagatopalopa epes hiasi. ¹⁶ Waf bu'wafi God nagatopalopapa dowafafi afamba ina fape atogon faloma waf awafi aman anamba atotona nanda'afi, owa'atin endilisi. Aman anamba nanda' waf atetef awafi. Ea' God nawaloga apa' epes hiapai na'i, "Ipa' awepa hi'alepa a'owa'."

Apa' manda' waf awafi hiafi apa' God okom maimailapa natopalopapa dowaf ea' na'i apa' epes be'epa hilili'i. ¹⁷ Aman anamba atotona nanda' waf awafi. Isimba atis dei' ga' nesafel nowalo' epes hiasi hi'alasa anen atona. Apa' maol aman anamba atotona Jisas Kraisi a' lu'win banagen a'owa' nikila' ga' ma nagatopalopa epes mamahisa God natopalopas dowafa sogofa' waf usi'ifi hilili'i, epes isimba atiasi sope namisa sogape dembesi.^c

¹⁸ Dei' apa' magape na'amba. Fowa' waf awafi atetef fanda' apa' hiapai higilalapa hi'alapa. Ea' na'amba atin waf usi'ifi atetef fatagwahepa ma

^z 5:11 Jen 2:17; Jen 3:6,19; Ro 6:23 ^a 5:12 Ro 4:15 ^b 5:13 1 Ko 15:21-22; 1 Ko 15:45
^c 5:17 1 Ko 15:22

waf awafi fanda'apa dei' mape namepa.^d ¹⁹Aman atotona nosambala basef Godi dei' apa' hiapai mape manda' waf awafi. Ea' na'amba atin aman bu'unai atotona naila basef ifimba, dei' apa' hiapai motaga usi'ipa hilili' ma naep Godi.^e ²⁰Ama main, mu'uli inimba God nogaso' Mosesani natagama esis sogogawa waf asasifi awafi sagatopa' mu'uli inimba. Apa' esis ina sakwaha waf afamba awafi, owa'atin. Sanda'af hiafi a'owa'. Apa' owa', ufia'w God nagatopalopa esisa'w dowafi kwataga lu'ukw a'owa' ma esis.^f ²¹Fowa' waf awafi fataga fape ilifa apa' hiapai dei' maga'. Apa' dei' waf God nagatopalopapa dowafafi fape ilif a'owa' fikila'. Anen natopalopapa ea' nopalapa amam nematawa usi'ipa hilili'i ma mogofa' ambal namili lagape lifilafi dondoli ma dembinai ape'inai Jisas Krai.

Apa' maga' ea' ma waf awafi, owa' Krai natopalopapa mataga wahifipa

6 ¹Ea' dei' apa' monda' basef maif wapani? Apa' mondanda' waf awafi atapipa ma atiasi waf God nogatopalopapa dowafafi feगतaga lu'wif a'owa'? Apa' mi'ias na'amba a'a owa'?'² Owa'atin endilisi! Waf awafi atef, dei' apa' maga' ea'. Dei' maina apa' ata' magafe' waf afambai awafi atef? Owa'atin, hapaifi.^h ³Ipa' pegawa apa' mamahepama mogofa' sa'ofa magape mandaloma sisihipama Krai Jisasi ea' mofa' sa'of maloma ga' ananini.ⁱ ⁴Sa'of inimba apa' mandaloma sisihipa maloma ga' Jisasi, God nawapa maloma Krai matmat. Banagami fasimi ahamanai atom masa'ma Krai nosafel matmat. Ea' na'amba atina apa' mosafel wapani mape banagepa mogafe' waf dambaifi ma ambal namili itap apa'e.^j

Apa' dei' mape namepa maloma Krai ea' anaf mosafel wapani molomana

⁵Apa' mandaloma endilisi tatala'ipa maloma anona ga' inimba ananini si'i anen nagaga'. Ea' na'amba atin anaf mandaloma tatala'ipa mosafel wapani molomana.^k ⁶Apa' mogawa opalef apimi ape'imi amamba maga' mail lawag usi'igai ti'wanaegai maloma Krai ea' God natalogofa banagami waf aunai manda' maol magape alop ape'ipii. Isimba atis dei' waf awafi ina fawasi'apa sisihipa wapani, owa'.^l ⁷Dei' main, anona aman nagaga'i, waf awafi ina ata' fahapilana sisihina wapani, owa'.

⁸Aho', apa' maga' maloma Krai. Ea' mogawa endilisi atiasi mope ambal namili molomana wapani. ⁹Apa' mogawa God nasa'ma Krai nosafel matmat ea'. Isimba atis anen ina atiasi noga' wapani, owa'. Ga' ina banagen a'owa' negatalogofa anen, owa'atin.^m ¹⁰Anen naga' atetef ea' ma'um. Ga' inimba atin anen nahambombaga banagami amamba waf awafii mowala hi'alam. Anen dei' nape ambal namili naila okom Godi

d 5:18 Ais 53:11 **e** 5:19 Ro 4:15; Ga 3:19 **f** 5:20 Ro 6:23 **g** 6:1 Ro 3:5-8; 1 Pi 4:1
h 6:2 Ga 3:27 **i** 6:3 Kl 2:12 **j** 6:4 Fl 3:10-11 **k** 6:5 Ga 5:24 **l** 6:6 1 Pi 4:1 **m** 6:9 Hi 9:26-28; 1 Pi 3:18

atom.ⁿ ¹¹ Ea' na'amba atina ipa' wapani a' ukup pendapoma ipa' atipa paga' ea' pakwaha waf awafi si'i sagaga'i. Ipa' ukup pendapoma ipa' ea' pape sisihipa paloma Kraiss Jisas pape namipa paloma God.^o

¹² Ipa' ina pi'i aho'ma waf awafi fepe fetaga banagef femafi ipa', owa'i. Na'amba waf afamba awafi fehende'epa a pila waf alop atopafi.^p

¹³ Ipa' ina peso' lagof bo'wagah ipe'isi sefe'ma penda' waf awafi, owa'i. Pendaso'anas God atona soloma nomonas ukup ipe'isi hi'indalasa anen atona si'i epes sotanima sogosafel matmat wapani sagape namis. Ea' ipa' pese'ana alop du'wa'wanipi hi'indalapa Goda penda' waf usi'ifi.^q ¹⁴ Ipa' pegawa waf aunai ina ata' nope lu'unama ipa' wapani, owa'i. Dei' main, ipa' dei' ina ata' pape lafela mu'uli inimba God nagaso' Mosesani ma pigailan, owa'atin. Ipa' apape lafela ufiaw' Godi ato'w okom maimailapa ma nagatopalopapa dowaf.^r

Apa' dei' mape manda' maola waf usi'ifi

¹⁵ Ea' dei' apa' ata' monda'as mi'imama? Apa' ina mape lafela mu'uli inimba God nagaso' Mosesani, owa'atin. Apa' dei' mape lafela ufiaw' akwamba God nagatopalopapa dowafa'wi. Ea' dei' apa' monda' waf awafi a'a owa'? Owa'atin endilisi.^s ¹⁶ I'i ipa' peso' ipa' atipa penda' maol pepe lafela aman ami, ipa' pape sisihipama anen atona. I'i ipa' peso' opalefa waf awafi, ipa' pape lafela waf afamba fawasi'ipa sisihipa paga'. Apa' i'i ipa' peso' opalefa waf bu'wafi, dao' pape lafela God pataga usi'ipa hilili' ma naep ananipi. ¹⁷ Endilisi, fowa' ipa' pape lafela waf awafi fawasi'ipa sisihipa. Owa' God nanda'epa pape lafela basef ananifi pailif ea' paso'ana ukup nelelemb hi'alasa pagaila basef ifimba endilisifi ipa' pigalafafi. Ea' apa' mundanifela God.^t ¹⁸ Anen natagwahipa ma banagami waf awafii, dei' pataga epes panda' maol pape lafela waf usi'ifi fawasi'ipa sisihipa. ¹⁹ Ukup ipe'ipi ina dei' banagep, owa'. Isimba atis dei' aila ukup apa' epesi a'ias alihis a'i. Fowa' ipa' ata' paso' alop ipe'ipi du'wa'wanip pape lafela waf awasif alugufi faloma waf hiafi sogosambala mu'uliefi ea' fawasi'ipa sisihipa. Apa' dei' peso' alop wa'awa'api hi'ilap pondafe'ma waf usi'ifi fiwasi'ipa sisihipa ma pegape Godi atipa si'ipa.

²⁰ Fowa' ipa' ata' pape lafela waf awafi fawasi'ipa sisihipa ea' nogota atamba ipa' ata' pape pelelama waf usi'ifi.^u ²¹ Ipa' pefa' hiahawes mais fasi ma waf awafi fowa' panda'afi, ma dei' ipa' ambagof awagufafi? Owa'atin. Waf afambai fagawalapai ga' atini. ²² Owa' dei' God natagwahipa ea' ma waf awafi nanda'epa pape panda' maola anen pape lafelana atapipa. Maol inimba atiasi netaga nela gwa'aisi isimba. Ipa'

ⁿ 6:10 2 Ko 5:15; Ga 2:19; 1 Pi 2:24 ^o 6:11 Jen 4:7 ^p 6:12 Ro 12:1; Ef 2:5, 5:14

^q 6:13 1 Jo 3:6 ^r 6:14 Ro 6:1 ^s 6:15 Jo 8:34; 2 Pi 2:19 ^t 6:17 Jo 8:32 ^u 6:20 Ro 7:5, 8:6,13

pepe be'epa hilili' ananipai atipa ma pegefa' ambal namili andeande' dondol lifilafi.^v ²³Waf awafi fagwamasa awami ma isimba sanda' maola waf awafii. Awami amamba. Esis atiasi sog'a atin higililas. Apa' God dei' naso'apai presen fasini dowaf, inimba ambal namili lagape dondoli ma mope sishipa mogoloma Krai Jisas.

**Basef waminif atina waf sandaso'amafi fa'ipapa dei'
manda' maola waf bu'wafi ma opaf dambaifi**

7 ¹Ipa' alipipai, ipa' pegawa mu'uli ma waf daso'amaifi ea'. Ea' pegawa andeande'ma basef ifimba dei' iga'ipipafi. Nogota atamba epen ata' nagape namin, anin ata' nape lafela mu'uli inimba. ²Basef kofagefa ma mu'uli inimba ifimba. I'i ano'w nemata'w kwagaso' amani, ma anen ata' nogape namona, mu'uli inimba ata' newa'ana naloma ako'w ata' sape sisihis. Apa' i'i waulunama'w nogaga', dao' mu'uli inimba nagahapilasi pele'atan kwape wahifi'w. ³Ea' i'i anen aman ata' nope ambal lapaona ma waulu'mana kofe' kogaso' anona aman daiana, ea' sofala'w si'i ako'w kwanda' waf awafi so'a waola anona aman daianai. Apa' i'i aman akwa'unai nogaga', mu'uli inimba ina ata' nahapilasi sisihis wapani, a' owa'. Ako'w kwandatagwah kwape wahifi'w. Esis ina si'i basefa ako'w si'i ako'w kwanda' so'a wauli, owa'atin.^w

⁴Ipa' alipipai ae'ipai, ae' a'i i'ipipa basef ifimba kofagefa. Apa' hiapai mape sishipa maloma Krai ea' isimba atis dei' maga' ea'. Dei' mu'uli inimba God nagaso' Mosesani ina ata' nahapilapa sishipa wapani, a' owa'. Apa' ea' mape sishipama anona aman God naso'mana nogosafel matmat wapanii ea' monda' maol ananini atin.^x ⁵Fowa' ata' magape atapipa opalef apimi, mu'uli inimba nafilai ukup awami ma alop ape'ipi. Ea' manda' maola waf awafi fataga ma ga' atin.^y ⁶Apa' dei' maga' maloma Krai makwaha hiahaom magahapilapa sishipai. Ea' mu'uli inimba ina ata' newa'apa wapani, owa'atin. Mape wahifipa. Dei' apa' ina ata' manda' maol maila mu'uli inimba amom manda'an nagail buki, owa'atin. Apa' manda' maola waf dambaifi Ambal bu'unai Godi nanda'afi.^z

Waf awafi fahambombaga apa'

⁷Dei' apa' ata' mi'ias mi'imama? Mi'i mu'uli atin waf awafini a'a owa'? Owa'atin endilisi! Mu'uli inimba God nagaso' Mosesani nihimba'me waf maif awafi kofagefa ma egegawaf. Waf afamba kowagalasafi fagape na'amba. Mu'uli inimba naga'ias na'amba na'i, "Ina kowolena ma anis hiahawes anona amani, owa'i."

^v 6:22 Ro 5:12,15 ^w 7:3 Ro 6:2,11; Ga 2:19 ^x 7:4 Ro 6:21 ^y 7:5 Ro 8:2, 6:4

^z 7:6 Eks 20:17; Diu 5:21

I'i mu'uli inimba owa' nihimba'me na'ambaea, ae' ina egawa waf awafi kowagalasafi. Apa' owa', owa'atin.^a ⁸Mu'uli inimba si'i ano'w ufia'wa waf awafi fagasa'mai okom naninani nanda' ae' kowagalema hiahaom hiami. Apa' mu'uli inimba owa'atinai, waf awafi si'i fagaga'i atef.^b ⁹⁻¹⁰Fowa' gani mu'uli inimba ata' owa', nogota atamba ata' ape okom mase'e lelama waf awafi. A'i owa' main owa', basef kofagefa ma mu'uli inimba fafi'mai ae' ea' waf awafi fesafel fafe' ambal ae'ali ea' fahe aga'ma mu'uli inimba. Doko' li' God nanda' mu'uli ananini ma nogase'e ambal namili owa', ae' ina' efa' ambal namilima mu'uli inimbai, owa'. Anin nahe andaga' atin.^c ¹¹Dei' main, waf awafi fasopama ufia'wa mu'uli inimba ea' fambaso'me. Mu'uli inimba nasa'ma okoma ae' nihimba'me waf awafi fahe aga'.^d ¹²Ea' apa' mogawa mu'uli atin, anin bo'wen hilili'i. Basef ifimba hiafi fagape mu'uli inimbai wapani be'ef hilili'i.^e

¹³Dei' a' main wapani? A'i mu'uli inimba fasini nahe aga'? Owa'atin endilisi! Waf awafi atef fahe aga'. Apa' hiahawes isimba si'i ano'w ufia'wa waf awafi fahe agaga'i ma waf afamba awafi kofagefa fetaga fendawalap. Ea' mu'uli inimba nihimba'mapa waf awafi kofagefa, afamba ea' awef endilisi a'owa'.^f

Waf awafi fala'ata ukup ape'ipi

¹⁴Apa' mogawa mu'uli inimba nafi'i Ambal bu'unai Godi nihimba'mapa okom ananini. Apa' ae' okom apinai nape ina aila okom Godi, owa'. Waf awafi fala'atae anda' maola waf anamba aunai.^g ¹⁵Apa' dei' ae' ina egawa waf kofagefa anda'afi, owa'. Waf ae' okom ma'ima'iaf a'i enda'afi, afamba ina anda'af, owa'. ¹⁶Okom ae'ami atom a'ias na'amba a'i aho'ma mu'uli inimba bu'wani ma eme'an igailan. Apa' owa', owa'atin. Ina ailan, owa'. Atolapan anda' waf awafi andaiwa'ma enda'afi. ¹⁷Apa' ina ae' atowe anda'an, owa'. Waf aunai nagape okom ae'anai nomoni, anamba atona nanda'am.^h ¹⁸Ae' egawa okom ae'anai nomon, ina anom nomonas bu'wami mape, owa'. Opaf anamba apinai ae'anai atona nahambombage. Endilisi, ae' okom ma'i enda' waf fasifi atef, apa' owa'. Ina la'ifiwi anda'af, owa'. ¹⁹⁻²⁰Aho', waf fasifi okom ma'i enda'afi, afamba ina anda'af, owa'atin. Apa' waf awafi andaiwa'ma enda'afi, afamba atef anda'af. Ea' ae' egawa ina ae' ela okom anda' amamba, owa'atin. Waf awafi fagape opaf ae' nomoni, afamba atef fanda'e anda'am.

²¹Isimba atis dei' ati waf na'ambaifi fape ae'. Okom ma'i enda' waf fasifi, apa' waf awafi fagape nomonas ae'ami anda'af. ²²Endilisi okom ae'ami ma'ima'i mu'uli inimba God nagaso' Mosesani a'owa' andagalaman.ⁱ ²³Apa' owa', ati anef waf dai'af fape alop si'ip wa'awa'ap

a 7:7 Ro 4:15 **b** 7:8 Je 1:15; Lev 18:5; Ro 10:5 **c** 7:9-10 Jen 3:13; Hi 3:13 **d** 7:11 1 Ti 1:8 **e** 7:12 Ro 5:20 **f** 7:13 Sam 51:5; Jo 3:6 **g** 7:14 Ga 5:17 **h** 7:17 Jen 6:5, 8:21 **i** 7:22 Ga 5:17; Je 4:1; 1 Pi 2:11

ae'api nomon. Ea' waf afamba fapa' faloma mu'uli inimba nagape okom ae'amii. Waf afamba atef fagape alop wa'awa'ap ae'apii fala'atae fanda' anda' maola waf afamba awafi. ²⁴Ea' owahipiwi! Ae' epen dagala akai, okom nimanimiwai. Atiasi ami netagwahowe ma opaf apinai dei' nahe agaga'i? ²⁵Owa', ae' anifela God! Anen atona nanda' Jisas Kraiis Dembinai ape'inai natagwahowe ape wahifiwi.

Dei' ape na'amba. Okom ae'ami atom, ape lafela mu'uli inimba, apa' opaf apinai ape lafela banagami waf awafii.

Krais nakwahomapa waf awafi ea' naso'apa Ambal bu'unai Godi apa'

8 ¹Basef ifimba fagali'i kofagefa ifimba. Apa' amam nematawa mape sisihipa magaloma Kraiis Jisasi, ina ata' anif basef dei' ma God nonda'mapa kota basef lu'wafi mogofa' akafimi ma waf awafi apa' manda'afi, owa'atin. ^{k 2}Dei' main, banagami Ambal bu'unai Godi nagaso'apa ambal namili ape'i, anen natagwahepa ma banagami waf awafii maloma banagami ga'i. Anen nanda'am na'amba ma Kraiis Jisas atona ea' mape sisihipama anen dei' mape wahifipa. ^{l 3}Maol mamahina mu'uli inimba God nagaso' Mosesani owa' banagena nenda'ania, God nanda'an. Dei' main, opalef apa' epesi pupulim, owa' banagema. Dei' God nanda' maol inimba na'amba. Nasapa'i Nogamana ananinai atona nafi'i nataga si'i apa' epes manda' waf awafii. Ama nokwahomapa waf awafi hi'ilaf okom mogaso'anaf dogw. Anen nafi'ima nogokwaha waf awafi apa' epesi feloma akafimi ma waf afamba ea' God naso'anam mapoma anen atona. ^{m 4}Anen nanda'am na'amba ma apa' mofe' mogaila waf be'ef usi'ifi fagape mu'uli inimbai. Dei' main, apa' dei' ina mafe' maila fe' inimba opalef apilifi, owa'. Mafe' maila fe' dambaini Ambal Godi.

⁵Epes sagaila waf opalef apilifi sagafi'i, ukup asasipi pafe' talala' paila hiahaom amamba opalef apilifi fagafagailami. Apa' epes ami safe' sagaila Ambal bu'unai Godii, ukup asasipi pafe' talala' paila hiahaom okom Ambal bu'winai naga'iami atom. ^{n 6}I'i ukup epes isimbai pepoma hiahaom awami ma nelelemb apimi asasimi atom, amamba mawalapai ga' higiligalasanai. Apa' epen ami nomonas ananisi sisihis sogapoma hiahawes Spirit Ambal Godi, epen inimba dei' nape ambal namili opaf fape awanef. ^{o 7}Epes mamahisa ukup pigaila waf opalef apimii, isimba sataga bousi Godi. Dei' main, esis ina sape lafela mu'uli hiani Godi, owa'. Ina banagesa sigaila mu'uli inimba, owa'atin. ⁸Epes mamahisa sagape lafela waf opalef apilifii, epes isimba ina la'ifisa sonda' waf God okom maga'iafi, owa'atin. ^{p 9}Apa' i'i endilisi Ambal bu'unai Godi nupaipa, ipa' ina ata' pape lafela waf afamba apifi awafi ma nembel apinai, owa'.

J 7:24 1 Ko 15:57 **k 8:1** Ro 7:23-24 **l 8:2** Ap 13:38, 15:10; Fl 2:7; Hi 4:15 **m 8:3** Ga 5:16,25 **n 8:5** Ro 6:21 **o 8:6** Mt 12:34; Jo 8:43, 12:39; Je 4:4 **p 8:8** 1 Ko 3:16, 12:3

Ipa' pape lafela waf Ambal bu'unaii. Apa' epen ami Spirit Ambal Kraisi owa' nope anina, inimba ina epen Kraisi, owa'.^q ¹⁰Waf awafi faha alop ipe'ipi ma atiasi pogaga'. Apa' i'i Kraisi nogape nomona ipa', Ambal ananinai nonda'epa pepe namipa. ¹¹Fowa' God nasa'ma Jisas notanima nosafel wandof. Ea' Ambal ananinai natopalopepa na'amba. Ipa' epes mamahipama Ambal bu'unai Godi nupaipa nomon, dao' a' nese'epa ambal namili alop ipe'ipi wapani. Ipa' pagaga' ea'i apa' owa', dei' anen nanda'epa pape namipa.

Ambal bu'unai Godi nanda'apa mataga awasi ananipai

¹²Ipa' alipipai ma wambota Kraisi, anif basef fagi'ma ifimba fa'i Kraisi natalepa ma maol lu'wani dei' apa' anof wiaf ata' fotaomapa ma mugaila okom Ambal bu'unai Godi. Apa' wiaf akapa ma mofe' mugaila opaf anamba apinai, owa'.^r ¹³I'i ipa' pefe' pigaila waf afamba opaf apinaima, anaf apega'. Apa' i'i ipa' peha waf awafi ipe'ifi fega' ma banagami Ambal bu'unai Godi, dao' anaf apepe namipa. ¹⁴Epes ami sagaila wafa Ambal bu'unai Godi, isimba dei' sape awasi Godi wambota ananisi.^s ¹⁵Dei' main, ipa' ina pefa' Ambal bu'unai Godi nahapilipa sisihipa si'i sanda' kalabusi ma ata' ombel mogahepa wapani, owa'atin. Ipa' apefa' Ambal bu'unai anamba nanda'epa pataga awasi Godi. Banagami Ambal bu'unai atom dei' mofalana ma'i, "Ahamapa! Ahamapa!"^t ¹⁶Ambal bu'unai Godi atona nape sisihina apa' natopalopa ambagof ape'igufi ea' dei' mawalapa basef ma'if alihif, mape awasi Godi.^u ¹⁷Apa' magape awasi Godii. Ea' anaf mofa' hiahaom Ahamapai moloma hiahaom anen nambe'ama Kraisi nugumafiami, mofa'am moloma Kraisi. I'i dei' apa' mofa' akafimi mogalomanama, anaf mofa' poe bu'wani endilisi nonda'apa mogala' molomana.^v

Anaf apa' mofa' poe bu'wani endilisi mogala' moloma Kraisi

¹⁸Ae' okom ma'i poe inimba bu'wani anaf netaga nendawalapa apa' gani heveni, inimba anaf nikila'am endilisi akafimi amamba apa' dei' mogofa'am nogota ata'i.^w ¹⁹Hiahawes hiasi lu'wis sa'wis God nanda'asi saloma apa' epes wapani masa'ma balagah naep do' endilisi ea' mape masasa nogota ape'itai ma awasi Godi anaf sotaga sondawalap alihis.^x ²⁰Dei' hiahawes isimba lu'wis sa'wis saloma apa' epes ata' mape wafipa dowaf, maol akapa. Ina apa' atepa mola ukup manda'am mape, owa'atin. God atona nala'ambemapa mape lafela anen mape masasa hiahaom lu'wami anaf na'i nonda'ama ape'i.^y ²¹Dei' hiahaom awami amamba hiami mowa' hiahawes God nanda'asi

q 8:9 Ga 2:20; Ef 3:17; 1 Pi 4:6 r 8:12 Ga 6:8; Kl 3:5 s 8:14 2 Ti 1:7; Mk 14:36 t 8:15 2 Ko 1:22 u 8:16 Ga 4:5-7; Re 21:7 v 8:17 Ro 5:2; 2 Ko 4:17 w 8:18 Kl 3:4 x 8:19 Jen 3:17-19 y 8:20 2 Pi 3:13; 1 Jo 3:2

salomapa epes mawasi'apa manda'apa awepa folo'walapa. Apa' anaf God notofa hiahaom amamba awami ea' mofa' mogogala'i mupe wahifipa andeande', amamba God nandandepam magapoma wambota ananisii.

²² Apa' mogawa hiahawes hiasi lu'wis sa'wis God nanda'asi same' akafimi si'i nemata'w kwa'i kogola awani. Ea' hiahawes isimbai salef kwapete' sape safi'isataga dei'.^z ²³ Apa' ina hiahawes isimba atis, owa'atin. Fa'i apa' epes ananipai wapani, God okom ma'i anaf owagama notopalopapa ma mogape andeande'. Ea' dei' anen nali' naso'apa Ambal bu'unai ananinai. Ambal anamba naso'apana dowafi si'i presen. Ea' apa' wapani mame' akafimi kilef mape mohafa anef nemaf God notalepa ma mogataga si'i awasi ananipai, ma nemaf afamba nogaso'apa alop dambaipi namupi.^a ²⁴ God nowambelapa dei' mahapifana mape mohafana nonda'apa mogataga endilisi dindi'i dondo' ma hiahaom amamba fasimi. Apa' hiahaom mape mogohafami ma magatolom ea'i, apa' ina ata' mope mohafam wapani, owa'. Apa' i'i anin epen nigati hiahawes isimba nape negehafasi ea', dei' maina ata' nepe negehafas wapani? Owa'atin. ²⁵ Apa' hiahawes apa' ata' owa' mugatilisia apa' mogawa endilisi anaf mogofa'asi, na'amba apa' ukup banagep papoma isimba ea' mape mahafas.^b

²⁶⁻²⁷ Ea' Ambal bu'unai Godi wapani nafi'i natopalopa apa' owa' banagipaia, nowa' banaga ukup ape'ipi. Nema' mamahefa apa' ukup owa' banagepa mogawa basef ifimba mogahali'anaefia, Ambal ananinai nandabeten natopalopapa. Anen nandabeten, apa' anen ina na'i nandabeten nahali'ana ma anif basef, owa'. Nanda' e waa atin nandabeten. Ea' God, nogawa ukup epesi hi'alep, nogawa okom Ambal ananinai wapani. Dei' main, nemaf afamba Ambal ananinai nandabeten na'amba, anen naila okom Godi nandabetena apa' epes ananipai.^c

²⁸ Hiahaom mamahoma ma'i mogatagamapai, bu'wami awami hiami, God nanda'am manda' maol atina mogatopalopa apa' epes ukup pagapagaila anini. Apa' epes isimba nogofalas ea'i ma sonda' maol sigaila okom ananimii.^d ²⁹ Dei' main, epes isimba God fowa' nogogawas ea'i nosaho'asa sotaga sondati na'amba atin si'i Nogamana ananinai ma anen notaga nogape si'i sahomas dembinai ma esis sahin owan wambota ananisi. ³⁰ Epes isimba fowa' nogosaho'as ea'i, anen nofalas wapani. Ea' isimba nogofalas ea'i, anen na'i esis epes usi'isi ma naep ananipi ea' naso'as banagami mogogala'i ananiami ma anaf sondati si'i anen.^e

God okom maimailapa ina nokwahepa, owa'

³¹ Apa' mame' basefa hiahaom amamba bu'wami God nanda'mapami dei' muwatanif mi'imama? I'i God nogatopalopapa, dei' anaf ina anis

^z 8:22 2 Ko 5:2-4; Ga 5:5 ^a 8:23 2 Ko 5:7 ^b 8:25 Sam 139:1; 1 Ko 4:5 ^c 8:26-27 Ef 1:11 ^d 8:28 Kl 1:18; Hi 1:6 ^e 8:30 Sam 118:6

la'ifisa sogohambombagapa, owa'atin endilisi.^f ³²Anen ina ombal mahanama nagaso'apai Nogamana ananinai, owa'atin. Anen nasapa'anai nafi'i ma nogatopalopa apa' hiapai. Na'amba dei' isimba endilisi atis anaf anen nogaso'apai anom hiahaom hiami wapani dowaf mugalumai anini.^s ³³Apa' epes nogosaho'apa ea'i, anaf epen ami ni'i apa' epes aupai manda' waf awafi? Owa'atin. God atona na'i apa' epes usi'ipai.^h ³⁴Anaf ina anis epes sofalapa si'i apa' epes aupai ma God nogagwamapa waf awafi ape'ifi, owa'atin. Dei' main, Krai Jisas naga' notanima nosafel wapani. Ea' anen nape wa'ol lagol kwahisigili Godi banagagoma ea' nandabetena nagatopalopa wapani.

³⁵Anaf maim da'im melefata ma mogakwaha okom Kraisi magamagailapai? I'i nimanimi mogatagamapa ma mogofa' akafimi ma nolomohapa klos luwaguf mais akapa a anis sohapa sonda'apa awepa ma i'i hiahaom awami mi'i mogahambombagapa, ma anis sohapa mogaga', anaf hiahaom amambai melefata ma okom Kraisi magamagailapai? Owa'atin endilisi.ⁱ ³⁶Endilisi, hiahaom na'ambaimi motagamapa si'i Baibel na'iam naga'i,

“Apa' mape amam nematawa ine'ipai, isimba atis dei' nimaguf hiafi sa'i sohapa moga'. Satelepa si'i sipsipa sa'i sohapa mondaga' atin.”^j

³⁷Apa' hiahaom amambai hapaimi. Krai anen okom maimailapa a'owa' ea' dondol nowa' banagapa nanda'apa mikila' hiahaom amambai endilisi. ³⁸Aho' ae' egawa endilisi, ina anom maefah la'ifima anaf melefata ma okom lu'unai Godi, owa'atin. Nema mamahefa apa' moga' a'a mogape, anen okom maimailapa atapim. Amom ensel maloma banagami awami mamimami mape mugumafi itapi, opa'wal, ma'akw, naoh, ambagof awami mamimami wapani a hiahaom dei' magapani a anom anaf migi' mogatagai, banagami mamimami ³⁹a hiahaom banagami awami magape ilifi itap awini a anom hiahaom migi' mogafi'i, hiahaom amamba hiami ina anaf la'ifima megelefata apa'ma okom lu'unai Godi, owa'atin endilisi. Anen okom maimailapa atapina nihimba'mapa amamba ma Krai Jisas Dembinai ape'inai.

Pol okom iwanim endilisi ma esis Israel

9 ¹Basef ifimba ae' aga'iefi endilisi, ae' aman Kraisi ea' ina ambaso'am, owa'. Ambal bu'unai Godi nihimba'me nalome umafi malogol gagape opaf ae' nomoni nihimba'me na'ipi aga'i basef endilisifi atifi. ²Basef ifimba na'amba. Opaf ae'afi nimanif endilisi ea' okom mandanda' mafe' aom dondol.^k ³Ae' okom ma'i a'owa' ma a'i God nowambilai esis alipisi esimbel atembel ae'asi Israel sotanimai. Ea' i'i

f 8:31 Jo 3:16 **g** 8:32 Ais 50:8 **h** 8:33 Sam 110:1; Ap 7:55-56; 1 Jo 2:1 **i** 8:35 Sam 44:22; 2 Ko 4:11 **j** 8:36 Jo 16:33 **k** 9:2 Eks 32:32

ano'w ufia'w na'ambaiai, ae' endabetena Kraisa ae' lamene egaho'ofa esis sogafe' wambel bu'wambili heven, apa' ae' owa'atin.^l ⁴Apa' Israel God nandandepapa ea'i, nanda'apa mataga awasi ananipai ea' na'i aho'ma mogati mogogala'i banagami ananimi. Anen nala' lapa basef ananifi nalomapa ea' naso'apa mu'uli bu'wani ananini naloma waf endilisifi monda' lotumafi. Apa' mofa' basef ifimba God naga'i endilisi atisafi.^m ⁵Bafapapa akupapa dembami ape'imi mamumba magali'i amamba ape'imi atom. Ea' esimbel ape'imbeli atembel Kraisa nataga epen, anen God nandandepana nasapa'ana nagafi'ii, nape nali'ma epes saloma hiahaom hiami numafiam. Anen God endilisinai ea' mondasa'ma agol ananigili dondol lifilafi. Endilisi.ⁿ

God nandandepa esis amam nematawa ananisi

⁶Apa' basef ifimba God nagala' lapafi ina higiligalef dowafi, owa'atin. Epes sagataga mini'ap Israeli, hiasi ina a' Israel atis endilisi God nandandepas ananisi ea'i, owa'.^o ⁷Ea' apa' ina a' mi'iam na'amba mi'i, “Esis sataga esimbel Abrahami ea' esis hiasi a sape batawis endilisi ananisi,” owa'atin.

Fowa' gani God naga'ipana na'amba na'i, “Esis esimbel Aisaki atis owagama sofa' agol wambota ine'isi.”^p

⁸Isimba na'amba. Anis batawis Abrahami ina awasi Godi, owa'atin. Isimba sagataga basef ifimba God nala' lafef nagaso' Abrahamafi atis, agol gatomas ea' bafasana Abrahami endilisi.^q ⁹Lapa basef ifimba faga'i na'amba fa'i, “Nemaf afamba andandepaf ea'i, bola itanimai ea' Sera kola awani aman.”^r

¹⁰Ea' ina isimba atis, owa'. Nogaopa'w biam Rebekai ahamam atotona ea' Aisak atona bafamapa ape'inai.^s ¹¹⁻¹²Apa' God okom mandanda' ea' ma waf nandandepa epesafi. Anen ina okom mandanda'ma maol epes sanda'ani ea' nosaho'as, owa'atin. Nogaopa'w amamba biam ata' mape nomona nembel akwa'umbili God na'ipa'w na'i, “Nogali'i dembinai a' nope lafela aonama nogagi'i. Sahomana anaf nonda'mana maol owamana.”

God naila okom ananimi atom dei' na'ipa'w na'amba. Anen ina okom ma'i anin maol bu'wani awani amom anaf monda'ani, owa'atin. Anen naila okom ananimi atom na'i basef na'amba.^t ¹³Amamba si'i Baibel naga'i, “Ae' okom maimaila Jekop, apa' Iso andaiwa'mana endilisi.”

¹⁴Ea' apa' dei' ata' mi'i main? Mi'i, “God nanda' waf owa' andeande'a?” Owa'atin endilisi!^u

l 9:3 Eks 4:22; Diu 7:6, 14:1-2 **m** 9:4 Mt 1:1-16; Jo 1:1; Ro 1:25 **n** 9:5 Nam 23:19; Ro 2:28 **o** 9:6 Jen 21:12 **p** 9:7 Ga 4:23 **q** 9:8 Jen 18:14 **r** 9:9 Jen 25:21 **s** 9:10 Jen 25:23 **t** 9:11-12 Mal 1:2-3 **u** 9:14 Eks 33:19

¹⁵Anen na'ipa Moses na'i,

“Endilisi, anaf ae' i'i uwahipigama epen mamahina iga'i uwahipigamani ea' etopalopa epen mamahina ae' okom ma' i gatopalopani.”^v

¹⁶Apa' ina mi'i ukup epesi atip paloma maol epesi atin sanda' God natopalopapa, owa'atin. God atona nati apa' uwahipipa dei' okom ananiami atom natopalopapa dowaf.^w ¹⁷Ea' Baibel na'i God na'ipa dembinai king Fero na'amba na'i, “Ae' a'i ihimba'masa banagami ae'ami epes hias ma anaf sogawalapa agol ae'agili siga'igol itap hiagoma. Isimba atis dei' afelena nanda' hiahawes isimba.”^x

¹⁸Apa' mogawa i'i God ni'i nogatopalopa anin epen dowaf, dao' anen notopalopan. Apa' i'i nogasopama opaf anin epenima, dao' nosopamamanaf.

Okom wandafunai Godi naloma uwahipimi ananiami

¹⁹Apa' ina' atiasi ni'ipa ae' na'amba ni'i, “I'i na'ambama, dao' dei' maina God ata' naga'iam atin naga'i epen kofagema mapomana waf awafi anin nanda'afi? Ami la'ifina negapa'aga okom banagami Godi mogohafili? Owa'atin.”^y

²⁰Apa' epen, ina' mamahinama ma ni'i niginifala God? Owa'atin. A'i malep sanda' nombol sagala'api la'ifipa piginifala aman anamba nanda'ap nagala'api piga'i, “Dei' maina ina' nanda'e na'ambae?” Owa'atin.^z ²¹Aman nagala' malihi nofa'i anep itap nala' maloh biahap, anep maol bu'wanipi, anep falafalafipi maol awaniapi. Endilisi isimba andeande'.

²²God wapani nanda'am na'amba atin si'i aman nagala' malihi. Fowa' nanda' epes sataga ea' naila okom ananiami atom na' aho'ma anis epes sogafe' ufia'w higiligalasa'wi. Esis safe' ufia'w akwamba, apa' anen ina nagwamasa waf awafi esis sanda'afi ulal, owa'. Anen ata' nanimbelis nape nasasas nogota laota ma anaf nogahambombagas. Dei' main, anen na'i nowalapa okom numbutinai ananinai notaga alihina noloma banagami ananiami ma epes hiasi sogogawam.^a ²³Anen na'i nowalepam motaga alihim hiahaom mogogala'i fasimi ananiami ma anis epes anen nagati uwahipisi sogogawam. Epes isimba anen naila okom ananiami atom fowa' nandandepasa nogaso'asa mogogala'i esis. ²⁴Amamba ea' ma'i apa' atepa. Anen nofalapa ea'. Ina nofala anis Juda atis, owa'atin. Nofala anis owa' Judaisia wapani.^b ²⁵Basef anona aman profet Hosea fowa' nanda'afi wapani faga'i na'amba fa'i,

“Esis amam nematawa isimba fowa' ina epes ae'asi, anaf i'i esis epes ae'asi, ea' epes isimba fowa' ae' owa' okom mogailasia egaso'asa

^v 9:15 Ef 2:8 ^w 9:16 Eks 9:16 ^x 9:17 Eks 4:21, 9:12; Eks 14:4 ^y 9:19 Ais 29:16, 45:9 ^z 9:20 Jer 18:6 ^a 9:22 Ro 8:29; Ef 1:3-12 ^b 9:24 Hos 2:23

opafia, anaf okom mimilas.^c ²⁶Ea' wambel ali' a'ipas agali, 'Ipa' ina epes ae'lipai', anaf wambel ambalemba atembel sofalas si'i, 'Esis awasi Godi nagape namunai.'^d

²⁷Fowa' profet Aisaia nondola'waifa esis Israel na'amba na'i, "I'i esis Israel sotaga hias a'owa' si'i ko'onaga gaga'oh naoh akata ai, ea' hapaisi. Anaf Dembinai nofa'ai kwasala'wis dowaf nokwahomas waf awafi sotanimai. ²⁸Anen nonda' basefa kot hi'ilif notopa'ef kwafalis nogwamasa akafimi epes hiasi itapasi hi'ilas."^e

²⁹Ea' na'amba atin si'i fowa' Aisaia na'ias naga'i, "I'i Dembinai banagonai nugumafi hiahaom hiamii owa' nosopama akafimi epes isimba sagape itap apa'ii ai, anaf apa' motaga lamonapa si'i walemb ambalemba bialemb Sodom Gomora. Apa' owa', owa'atin. Nasopamam ea'."^f

Esis Israel sanda' maola sogofa' waf usi'ifi

³⁰Dei' apa' ata' mi'ias mi'imama? Apa' mi'ias na'amba mi'i, "Esis owa' Judaisia ina sanda' maol noma'wini ma sogofa' waf usi'ifi, esis sofa' waf afamba ea'. Esis sahapifa God sofa' waf afamba usi'ifi.^g ³¹Apa' esis Israel sanda' numa'umi ma sagaila mu'uli God nagaso' Mosesani ma sogofa' waf afamba usi'ifi, owa' esis ina sofa'af, owa'atin."^h

³²Dei' main, esis sandaiwa'ma sohapifana sogofa' waf usi'ifi. Esis ukup pandanda' pa'i sonda' maol atin sofa'af. Owa' asendesambaola anom otam sowa.ⁱ ³³Amamba si'i Baibel naga'i, "Peme! Ae' ambe' anom otam wambel lu'wambili esis Israeli agol Saion. Otam amamba banagami motawa mogahambombaga epes sendesambaola sogowa. Apa' epen ami nigahapifa aman anambai, anaf anin ina okom iwanim, owa'atin. Nepe sonohan."

Israel ina sofa' waf usi'ifi Godi, owa'

10 ¹Alipipai, okom ae'ami ma'ias a'owa' andabetena anaf God nofa' esis Israel nokwahomas waf awafi sogotanimai. ²Ae' egawa esis andeande' ea' a'i isimba. Esis ukup pehafel a'owa' sanda' maol banagani ma sagaila God, apa' owa' esis ina sogawa basef Godi endilisifi andeande', owa'atin.^j ³⁻⁴Esis ukup mahamahasa waf God nanda'afi ma noga'i apa' epes usi'ipai. Ea' sanda'am sandawalapa waf usi'ifi asasifi atefa sagaila mu'uli inimba God nagaso' Mosesani. Ea' esis ina safe' lafela Goda noga'i apa' epes usi'ipai, owa'atin. Apa' Krais nafi'i nataga ea'. Isimba atis dei' apa' ina ata' mape lafela mu'uli inimba, a' owa'atin.

c 9:25 Hos 1:10 **d** 9:26 Ais 10:22-23 **e** 9:28 Ais 1:9 **f** 9:29 Ro 10:20 **g** 9:30 Ro 10:2-3 **h** 9:31 Ais 8:14 **i** 9:32 Ais 28:16; 1 Pi 2:6; Ro 10:11 **j** 10:2 Mt 5:17; Jo 3:18

Anen nafi'i nandawalapa amam nematawa mamahisa sagahapifa anini ea' dei' God nofalas na'i esis amam nematawa bo'wes hilili'i.^k

⁵Waf afamba epen nagaila mu'uli inimba ma God naga'i anin usi'ini, Moses fowa' naga'ias na'amba na'i, "Epen ami nenda' waf afamba hiafi andeande' hi'igalafi, anaf anin nefa' ambal namili ma nigaila mu'uli inimba."^l

⁶Apa' waf epen nagahapifanai God na'i anin usi'ini, waf afamba faga'ias na'amba fa'i, "Ipa' owa'i ukup pendanda' ma nelelemb ipe'ilimbi pi'i, 'Anaf ami nefe' nelota heven?' nihali' Krai nigisila'i, owa'i.

⁷"Ea' ipa' owa'i pi'ias na'amba pi'i, 'Anaf ami nefe' newala wambel epes sagaga'ii nihali' Krai notanimai.' Na'ambai wapani owa'i."

⁸Apa' basef ifimba fa'i main? Ifimba faga'i na'amba fa'i,

"Basef ifimba fape felefele'ma ipa', fape malogufi nelelemb ipe'isi."

Basef apa' magahapilafi mawalapef maga'iefi ifimba. ⁹I'i ipa' pewalapa basef ifimba alihif pi'i Jisas anen Dembinai ma pihapifa God nelelemb ipe'ilimbi pi'i anen nasa'mana nogosafel matmat wapani, bola God nofa'ai ipa' wapani pitanimai pepe andeande'. ¹⁰Dei' main, apa' mahapilif nelelemb ape'ilimbi God na'i apa' amam nematawa magataga be'epa hilili' ea'i. Ea' mawalapa hapif malogof ape'igufi God nofa'apa nokwahomapa waf awafi mutanimai mape andeande'.^m

¹¹Amamba si'i Baibel naga'i,

"Epen mamahina nagahapifa anini, anaf epen inimba ina okom iwanim, owa'atin."ⁿ

¹²Esis Juda saloma isimba owa' Judaisia ea' na'amba atin, God anen Dembinai atotona apa' hiapaii. Ea' anen natopalopapa naso'apa waf bu'wafi dowafa epes isimba mamahisa sogofala anini,^o ¹³si'i Baibel naga'i,

"Epes mamahisa soga'i agol Dembinai ma sogofala anini, atiasi nofa'as nokwahomas waf awafi sotanimai."

¹⁴Apa' i'i esis owa' sohapifanaia atiasi sofalana sogawana si'i mama? Ea' esis i'i owa' seme' basefanaea, atiasi sohapifana si'imama? Ea' i'i anin epen owa' ni'ipasa basef esisa, dei' esis sogawef si'imama? Owa'atin endilisi.^p ¹⁵I'i God owa' nosapa'i amam amambaia, dei' atiasi amom mefe' mowalapef mi'imama? Owa'atin. Si'i Baibel naga'i na'amba na'i,

"Awasi! Maol inimba epes sofa'i basef bu'wafi ae'afi sogafi'ii, inimba fasini endilisi a'owa!"^q

Esis Israel ina saila basef bu'wafi Godi, owa'atin

¹⁶Apa' ina Israel hiasi saila basef ifimba bu'wafi Godi, owa'atin. Fowa' profet anamba Aisaia naga'i na'amba na'i,

k 10:3-4 Ro 7:10; Ga 3:12 **l** 10:5 Diu 30:12-14 **m** 10:10 Ro 9:33 **n** 10:11 Ap 15:9

o 10:12 Joe 2:32 **p** 10:14 Ais 52:7 **q** 10:15 Ais 53:1; Jo 12:38

“Dembina, anaf ami nihapila basef ifimba esis sogame'efa afali?
Owa'atin.”^r

¹⁷Ea' apa' mogawa, apa' hiapai mame' basef bu'wafi ea' ifimba atif fasa'mai hapif ape'ini. Ea' dei' basef ifimba fataga ufa'w mai'w? Ifimba fataga amom magawalapa basef Kraisi atom.^s ¹⁸Apa' ae' a'ias na'amba. A'i esis ina same' basef ifimba bu'wafi? Owa'atin. Esis same'ef ea', si'i Baibel naga'i,

“Basef fafe' fandahama walemb hielimbi fafe'agon hi'alagon.”^t

¹⁹Ae' etambel a'ias. A'i esis Israel sogawa basef ifimba a'a owa'? Owa'atin. Sogawa ea'. Moses nali' naga'i basef ifimba na'i,

“God na'i, ‘Ae' efa' anis amam nematawa falafisi, esis ina epes banagasi anep mini'ap endilisipi, owa'. Ae' ifa'asi etopalopas falafis anaf ipa' kowolepama waf bu'wafi ae' enda'masaf esisi. Ae' ifa'ai epes isimba owa' sogogawaia ea' anaf ipa' pinifalis penda' megahohas.’”^u

²⁰Apa' Aisaia ina ombal mahana ma na'iam nagawalapam, owa'atin. Anen nawalapam na'iam alihim na'amba na'i,

“Epes isimba owa' sogolaoma ae'ia, dei' satolowe ea'. Epes isimba owa' sogahali'asa ae'ia, dei' ataga andawalapa esis.”^v

²¹Apa' esis Israel ina na'ipas na'amba, owa'atin. Anen na'ipas anif daif na'i,

“God na'i, ‘Epes isimba sanda' du'wanigai sogosambala basefi. Nogota lautai a'owa' ae' e'fals anda' lagof iwaulasi. Owa', owa'atin.’”

God natopalopa Israel mini'ap du'wanis atis

11 ¹Dei' a'i ihali'ipa, God a' nali'amonu Israel hiasi mini'ap ananisi? Owa'atin endilisi! Ae' wapani Israeliwai esimbel Abrahami, wambota Benjamini.^w ²Mini'ap isimba Godi anen fowa' nandandepas ea'i, ina nali'amonas, owa'. Ipa' pegawa basef Elaijai fagail Baibeli. Elaija nandabeten nanda' kotima esis Israela God, naga'i na'amba na'i,^x

³“Dembina, esis saha amom profet maga'. Ea' sugulata belitagw ine'igwi sondolaliminama. Ea' ae' atowe ata' atapiwi ape profet anda' maola ina'. Dei' esis salasolaome ma sehe egaga.”^y

⁴Apa' God nagwamana basef maif Elaija? Anen na'ipana na'i,

“Ae' ifa'ai epes hiasi 7,000-pelais ae'asi, isimba ina sanda' lotuma god baso'amunai Baal, owa'.”^z

⁵Isimba ea' na'amba atin si'i dei' wapani esis mini'ap du'wanis sape, God fowa' natilis uwahipis natopalopas dowaf. Isimba atis dei' nosaho'asa

^r 10:16 Jo 17:20 ^s 10:17 Sam 19:4 ^t 10:18 Diu 32:21 ^u 10:19 Ais 65:1 ^v 10:20 Ais 65:2 ^w 11:1 1 Sml 12:22; Sam 94:14; Fl 3:5 ^x 11:2 2 Kin 19:10,14 ^y 11:3 1 Kin 19:18
^z 11:4 Ro 9:27

sagape epes ananisi si'is.^a ⁶Anen nati uwahipis natopalopas dowaf nosaho'as. Anen ina okom mandanda'ma anin maol bu'wani esis sanda'ani nosaho'as, owa'atin. I'i esis sonda' maol bu'wani ma God nosaho'asai, anen ina a' niti uwahipis maol bu'wani ma God nosaho'asai, anen ina a' niti uwahipis notopalopas dowaf nosaho'as, owa'atin. I'i na'ambaiai, waf afamba nagati uwahipisafi, afamba falafifi atef, owa' endilisifia.^b

⁷Dei' apa' ata' mi'ias mi'imama? Waf afamba God niti epes niga'i be'es hilili'i, afamba esis Israel sanda' numa'umi ma sa'i sogofa'afi, apa' ina sofa'af, owa'. Fowa' God nosaho' esis du'wanis atis ea' isimba atis sofa'af. Apa' esis Israel hiasi opalef asasimi maso'as ea',^c ⁸si'i buk Baibel naga'i, "God nanda' opalef asasilifi si'i saga'oh. Nanda' naep asasipi ina pati ea' esis ina same' basef kofagefa, owa'atin. Ea' sape na'amba atin safi'i sataga dei'."^d

⁹Devit wapani na'i basef ifimba atifa waf opalef esis Israeli maso'as ea' na'i,

"Ae' a'i nemaf afamba esis sope sog'a' gwa'aisi
lu'wasi atin, God nowasi'asa nogagwamasa
waf awafi esis sanda'afi si'i mandelef sandolam mail alialefa
mogowa' mafis, ea' si'i isalefi waiwa sanda'am magapoma mafisi.

¹⁰"Ae' a'i naep asasipi petaga walufipa ina
atiasi siti. Ea' ina' awi nenda' nimanimi akafimi
mindiwa alafugah asasigahi ma atapis
sogape na'amba atin."^e

Atiasi God nofa'ai esis owa' Judaisia sotanimai wapani

¹¹Dei' ae' ahali'ipa. Esis Juda sendesambaol sowa lamonas? Owa'atin endilisi! Esis sololama ufia'w sanda' waf awafi, isimba atis dei' God notanima nofa' anis epes sogololama Godi owa' Judaisia sotanima safe'ma anen. God nanda'as na'amba ma esis Juda ata' sigati waf afamba fasifi nanda'masaf esis sogololama anini ma anaf esis Juda kowogalasa waf afamba bu'wafi God nanda'masafi. ¹²Esis Juda sowa' alafugaha God, isimba atis dei' anen natopalopa amam nematawa hiasi itapasi sagape walemb hiagomai. Esis Juda sololama waf Godi, isimba atis dei' God natopalopa isimba owa' Judaisia nofa'as sotanimai sogape andeande'. Ea' nemaf afamba esis Juda hiasi hi'ilas dondo'ma ikwaf God okom maga'ieffi sotanima sifi'mai anen, esis misi'ah hiasi owa' Judaisia, God notopalopas endilisi ma nofa'ai hiasi sogotanimai.

¹³Dei' a'i ese'epa anif basef ipa' atipa owa' Judaipaia. God nasapa'e afe'ma anda' maola esis owa' Judaisia si'i ipa'. Ea' sonahema maol

a 11:5 Ga 3:18 **b** 11:6 Ro 9:31 **c** 11:7 Diu 29:4; Ais 29:10 **d** 11:8 Sam 69:22-23; Sam 35:8 **e** 11:10 Ap 13:46; Ro 10:19

inimba bu'wani dei' anda'ani. ¹⁴Maol inimba ae' okom ma'ian a'owa' ma egasa'ma esis Juda wambota ae'asi ma kowogalasa ipa' dei' pape andeande' pagaloma Godi. Ama ae' egefa' esis Juda du'wanis atis sotanima sogafe'ma God. ¹⁵Aho', anen nowa' alafuga ma esis, isimba atis dei' nofa'ai anis epes itap hiagoma sataga nembel atembel salomana. Ama anef nemaf God noso'as nembela esis Juda sotanima sogafe'ma anen, notopalopa epes hiasi itap hiagoma sotanima sope andeande' sondagala si'i sondagala ma anis epes saga' sotanima sogasafeli.^f

¹⁶Waf afamba esis Juda sotanima sogafe'ma God si'i basef waminif atini na'amba fa'i, i'i bret du'wanita tagali'i sanda'ata saso'anata Godi bo'ota hilili', ea' bret si'ita wapani Godi bo'ota hilili'i atota. I'i esis soso'ana nombalef lawagilif si'ililif God, dao' agufugama wapani Godi atoga.^g

¹⁷God nindiwaga nelefata anogof agof lawag oliviga sagawaga aofi ea' nofa'ai anogol agola anoga lawag oliviga alupugai nuwataniaga lawag agamba sagawaga aofi. Ipa' owa' Judaipaia, ipa' si'i agol lawag agamba alupugai. Isimba atis dei' ipa' pefa' hiahaom maim bu'wami mataga ma epes isimba Juda si'i agol lawag agamba alupugai gogofa' ifata nombalef lawag sagawaga aofi.^h ¹⁸Dei' ipa' owa' Judaipaia ina pi'i ipa' atipa bu'upai pikila' esis Juda si'i agof agwafomba God nigindiwagufi, owa'. Ipa' ina' pi'i ipa' bi'ipai esis epes awasi, owa'i. Dei' main, ipa' ina pegewa' banaga nombalifi, owa'. Nombalef atelef fewa' banagaipa. ¹⁹A'i ipa' atiasi pi'ias na'amba pi'i, "God nindiwa agof agwafomba ma nogowatani apa' si'i anogol agol lawagigil."ⁱ

²⁰Dao' andeande', apa' esis Juda ina sahapifana, isimba atis dei' nahape'as. Apa' ipa' pahapifana dei' pape sisihipama anen. Apa' ipa' owa'i pesa'ma agof ipe'igufi pi'i ipa' atipa bu'upaia, owa'i. Ipa' ombal mondahepa solawaipa. ²¹Fowa' God ina na'i aho'ma esis Juda si'i agof agwafomba lawag sagawaga aofi fape atapiguf, owa'. Ipa' solawaipa. Na'amba nonda'mepas na'amba atin si'i nanda' esis.^j

²²Ea' ipa' ukup pendanda'mam andeande' okom biafim Godi uwahipimi wandafumi wapani. Epes sagakwaha waf ananifii, na'ipas dindinip. Apa' ipa' God naga'i uwahipipai, i'i ipa' pigaila uwahipimi amamba, dao' andeande'. Apa' i'i owa', anaf notopa'epa wapani. ²³I'i esis Juda sokwaha waf awafi sogosambala Godafi, dao' atiasi nofa'as sotanimai si'i nogowatania agof agwafomba fowa' nigindiwagufi. Endilisi, God banagonai ma nonda'as na'amba. ²⁴Ipa' pegawa fowa' ipa' ata' papani atin si'ipa lawag oliv alupugai, ea' God nanda' anin maol daiana ipa' natopa' anogol agola lawag agamba ea' nowataniaga anoga lawag oliv bu'ugai sagawaga aofi. God nanda' maol inimba. Ea' endilisi atis, anaf

^f 11:15 Nam 15:17-21; Esi 44:30 ^g 11:16 Ef 2:11-19 ^h 11:17 Jo 4:22 ⁱ 11:19 Ro 12:16
^j 11:21 Jo 15:2,4; Hi 3:14

a' nofa' esis Juda sotanimai si'i agof nindiwagof lawag sagawaga aofi nuwataniagof fitanima fope lawag afafugai si'iga. Maol inimba ina ahifina anen, owa'. Andipeni.^k

God nati epes hiasi uwahipis natopalopas dowaf

²⁵ Alipipai, ae' andaiwa'ma ipa' ukup pegehepama basef ifimba fowa' fandambahi'i dei' fandawalap alihif. Na'amba ipa' ukup pendanda' ma ipa' atipa pi'i, "Apa' mogogawai." Basef ifimba fowa' fandambahi'i na'amba. Esis Israel opalef asasilifi faso'as, apa' ina faso'as atapilif fape, owa'. Fefe' fefe' fendahama nogota atamba esis owa' Judaisia hiasi sifi'i sogafe'ma God dondo' ma ikwaf okom ananiami maga'iefi.^l ²⁶ I'i owa' main, esis Israel hiasi God nofa'as nokwahomasa waf awafi sotanima sifi'mai anen si'i Baibel na'ias naga'i,

"Anaf aman anamba nofa'as sogotanimai,
nupani wambel Saion nifi'i notagwaha waf
awafi esis wambota Jekopi, waf awafi
sogosambala basef Godiefi.^m ²⁷ Anef nemaf
ekwaha waf hiafi awafi asasifi okom mose'ef,
i'ipasa basef agala' lapafi esis."

²⁸ Juda sosambala basef bu'wafi Godi, sataga bousi ananisi saha'ofa ipa' owa' Judaipaia nofa'epa pigatanimai. Apa' God fowa' nosaho'as ea' okom maimailas. Dei' main, anen okom mapoma bafasam asasimi ma basef ifimba nala' lap nagalomamafi. ²⁹ I'i God nondandepa anin epen noso'an presen fasini dowaf, anaf anen ina nosambala basef ifimba ni'ipan ni' hapaifi noho'ofef, owa'atin. Basef ifimba atapif fepe.

³⁰ Fowa' ipa' owa' Judaipaia pesambala basef Godi. Ea' esis Juda wapani sosambala basef ifimba. Isimba atis dei' ipa' pefa' okom uwahipimi Godi. ³¹ Ea' na'amba atin dei' esis Juda wapani sosambala basef ama dei' sogofa' okom amamba uwahipimi Godi si'i ipa'.ⁿ ³² God nanda' epes hiasi hi'alas sogape lafela waf afamba sogosambala basefafi ma anen anaf niti esis hiasi uwahipis nogatopalopas dowaf.^o

Apa' mondasa'ma agol Godi lu'wagol

³³ Awasi! Okom Godi naloma gawa ananini fasini lu'um a'owa' endilisi. Apa' epes ina la'ifipa endilisi ma mogogawa kofagama basef ananifi, okom hiami mogatambela, owa'atin. Apa' owa'atin endilisi ma mogawalapa basefa anen okom maga'iefi. Ea' apa' owa' mogawa waf hianai ananinaia, owa'atin.^p

^k 11:24 Ro 12:16; Lu 21:24; Jo 10:16 ^l 11:25 Mt 23:39; Ais 59:20-21; Sam 14:7

^m 11:26 Ais 27:9; Jer 31:33-34 ⁿ 11:31 Ga 3:22; 1 Ti 2:4 ^o 11:32 Ais 55:8-9

^p 11:33 Ais 40:13; 1 Ko 2:16

³⁴Endilisi atis, si'i Baibel na'ias naga'i, "Ami negawa okom Dembinai? Ami naso'ana nomonas anen?^q ³⁵Ami nali' naso'ana hiahawes anen ama atiasi nogagwamanas? Owa'atin endilisi."^r

³⁶Anen nanda' hiahaom hiami hi'alam magape ilif itapi numafiam maloma epes. Ea' hiahaom amamba hiami maloma epes mape ma mogasa'ma agol ananigili atogol. Apa' epes hiapai hi'ilapa mondasa'ma agol ananigili lifilafi dondol. Endilisi.

Apa' mondolali ma God mondaso'ana alop ape'ipi si'ip

12 ¹Alipipai, basef ifimba hiafi fagali'i endilisifi atif. Isimba atis dei' ahali'ipa dindinipa ipa' ukup pendanda'ma okom lu'unai Godi naganagaila ape'i nagati apa' uwahipipa. Ea' pindilali ma anen si'i fowa' saha mafis sagaso'ana pendaso'ana alop ipe'ipi si'ip hi'indalap. Alop ata' pope namop atapip pese'anap God atona hi'ilap ea' ananipi si'ip, si'i waf anen okom maga'iefi. Ipa' penda'as na'amba, penda' lotu endilisi ma God ukup ipe'ipi nomon.^s ²Ipa' ina pepe pindati na'amba atin si'i sagaila waf itapafi, owa'i. Ipa' pi'i aho'ma God nonda' ukup ipe'ipi nomon petaga dambaipa waf ipe'ifi atiasi feगतaga dambaif wapani. Ma bola pegegawa waf endilisifi God okom maga'iefi. Waf afambai bu'wafi usi'ifi.^t

Apa' monda' maol mundaila gawa fasini God nagaso'apani

³God natopalope dowaf, isimba atis dei' a'ipipa atona atin. Ipa' pegawa waf faloma gawa ipe'ini sandanda' sa'imama, apa' ipa' ina ukup pendanda' pi'i ipa' atipa fasipai endilisi, owa'i. Ipa' ata' pewaloga ipa' ukup pendanda' pefe' andeande' pendahama hapif ipe'ini God nagasi'ipani nafe' negetambel.^u ⁴Apa' mogawa alop ape'ipi atotop, apa' sa'osa'opa hiapi. Ea' apamba hiapi ina panda' maol atifin, owa'atin. Panda'an daindai.^v ⁵Ea' na'amba atin apa' amam nematawa hiapai magape sisihipama Kraisi, apa' si'i alop atotop. Ea' apa' hiapai atona atin si'i mandatopalopa atin magaloma anop alop wa'awa'api hiapi.^w ⁶God natopalopapa dowaf naso'apa presen hiahaom fasimi ananiami maloma gawa naninani. I'i God nosa'ma okom anin epeni ma negawalapa anif basef, anin nendawalapef dondo' ma hapif ananini. ⁷Epen mamahina negatopalopa esis sahin owani, anin nendanda' maol inimba endilisi negatopalopa alipisi. I'i epen gawaini ma nigihimba'mas si'i tisai, anin nendanda'an endilisi nihimba'mas.^x ⁸Ea' epen ami negegawa ma negafela ukup esis epesi, dao' anin nendanda' maol inimba endilisi negasa'ma ukup asasipi. Epen negaso'an hiahawes anin alipinii, anin a' nendaso'an hias. Epen nigimafi anin maoli, okom

q 11:34 Jop 41:11 **r** 11:35 1 Ko 8:6 **s** 12:1 Ef 4:23; Ef 5:10,17; Ro 6:11,13; 1 Pi 2:5; Jo 4:24 **t** 12:2 1 Ko 12:11; Ef 4:7 **u** 12:3 1 Ko 12:12 **v** 12:4 1 Ko 12:27; Ef 4:25
w 12:5 1 Ko 12:4-11; 1 Pi 4:10-11 **x** 12:7 2 Ko 9:7

ananimi mondohafel endilisi ma maol inimba. Epen nigati anin alipini uwahipini ma netopalopan nigimafiani, anin sonohan nendatopalopan.^y

Waf endilisifi ma ukup pigapigaila esis sahin owan

⁹Ipa' ukup pagapagaila esis sahin owan, dao' ipa' ukup pindailas endilisi. Ipa' ina pembmaso'am, owa'i. Ipa' pendewa' alafugah endilisi ma waf awafi, pendape sisihipa endilisi ma waf bu'wafi.^z

¹⁰Ipa' pendaso'asa opalef esis sahin owan ukup pindailas endilisi. Ipa' hipai atona atin pendasa'ma agof isimba anis daindaiasi atis.^a ¹¹Ipa' pendanda' maol banagambel lifilafi ukup pehafel a'owa' penda' maol Dembinai.^b ¹²Ipa' pepe pehafa Dembinai nogatopalopepa. Ea' pendagala atin hi'indalepa. I'i nimanimi mogatagamepa, pilutu banagepa. Ea' pendabeten nimaguf danda lifilafi.^c ¹³I'i amam nematawa Godi hiahawes akas, dao' petopalopas pese'as. I'i epes analemb walemb lauguni sifi'i sogatagamepa, dao' pimafias andeande'.^d

¹⁴Epes sogahambombaga ipe'i, pendabeten pihali' Goda nofalo'mas sogataga andeande'. Aho', pendabetena esis. Apa' ipa' ina pendabeten pihali'ana nonda' esis awes, owa'i.^e ¹⁵Esis epes sondagalai, ipa' sonehepa pendalomas. Ea' isimba sogalifi, pelef pelomas.^f ¹⁶Ipa' ukup pendapoma sahin owan ipe'isi hi'indaldas pepan opalef atelef pendalomas, si'i ukup pagapoma ipa' atipa. Ipa' ina ukup pendanda'ma ipa' atipa pi'i dembipai, owa'i. Pefe' peloma epes isimba falafisi. Ipa' ina ukup pi'i ipa' atipa gawaipai, owa'i.^g

¹⁷I'i epes sonda' waf awafi ma ipe'i, ina pegwamasa waf awafi esis, owa'i. Ipa' ukup pendapoma waf bu'wafi ma naep epes hiasii penda'af.^h ¹⁸Ipa' ina ukup pendanda'ma wandaf, owa'i. I'i ufiaw andepa'wai, ipa' pepe opalef atelef pelomas hi'indaldas.ⁱ ¹⁹Ipa' alipipai ae'ipai endilisi, ina pegwamasa waf aunai esis sanda'mepa anai, owa'i. Ipa' pindihi'amas sondafe'mago Goda okom wandafunai nondanda' maola esis. Dei' main, basef fagail Baibeli fa'i,

“Waf gwaifi ma anis epes sanda' waf awafii,
afamba maol ae'ani. Ae' atowe bola egwamasa
waf afamba awafi ma esis.” Dembinai naga'i na'amba.^j

²⁰Apa' ipa' penda'as si'i Baibel naga'i,

“I'i bousi ipe'isi nolomohas, dao' pese'asa gwa'aisi esis. I'i iap pese'as,
pese'asa embel. I'i ipa' penda'as na'amba, atiasi penda' esis

Y 12:8 1 Ti 1:5; 1 Pi 1:22; Emo 5:15 **Z 12:9** 2 Pi 1:7; Fl 2:3 **a 12:10** Ap 18:25; Re 3:15
b 12:11 1 Te 5:17 **c 12:12** Hi 13:2 **d 12:13** Mt 5:44; Ap 7:60; 1 Ko 4:12 **e 12:14** Sam
35:13 **f 12:15** Ro 15:5, 11:20; Pro 3:7; Ais 5:21 **g 12:16** 1 Te 5:15 **h 12:17** Mk 9:50; Hi
12:14 **i 12:18** Diu 32:35; Mt 5:39; Ro 13:4; 1 Te 1:6-7; Hi 10:30 **J 12:19** Pro 25:21-22; Mt
5:44

ambagof awagofa waf awafi asasifi.” ²¹ Ea' dei' a'lipipa, ipa' ina pepe pititi waf awafi fikila' ipa', owa'i. Apa' pendanda' waf bu'wafi ma pegatalogofa waf afamba awafi.

Apa' mondape lafela amom gavman

13 ¹Epes hiasi a' sondape lafela amom gavman. Apa' mogawa ina anona gavman nataga dowaf, owa'atin. Maol hiani gavmani nataga lagol Godi atogol. Ea' gavman amamba hiami magapani, God atona nanda'am mape.^k ²I'i epen mamahina negesambala basef gavmani, anin nesambala waf Godi wapani. I'i epes ami sogosambala amambai, atiasi sofa' akafimi awami ma waf afamba esis sanda'afi.^l ³Amom gavman ina mapoma mugaumbela epes isimba sanda' waf fasifii, owa'. Amom mapoma mugaumbela epes isimba sanda' waf awafii. I'i ipa' pindaiwa'ma ombal mogahepama amom gavmana, dao' penda' waf bu'wafi atefa amom atiasi moganifela agof ipe'igufi.^m ⁴Gavman manda' maola Godi motopalopepa pegape andeande'. Apa' i'i ipa' penda' waf awafi, ipa' ombal mondahepamam. Ipa' pegawa bainat anamba magahapilanai, ina mahapilana dowaf, owa'. Manda' maol Godi ma mogogwa akafimi awami ma isimba sanda' waf awafii. ⁵Na'amba dei' apa' a' mondape lafela amom. Apa' ina a' ombal mohapama akafimi amamba atom awami ea' mila basef amamifi, owa'. Apa' mundaila malogof fagape opalef ape'ilifi nomon monda'as na'amba.

⁶Isimba atis dei' ipa' panda' tekis. Dei' main, amom gavman manda'mana maol Godi dondol banagem mumafi maol inimba atin.ⁿ ⁷Ipa' maol inimba napomepa ma pegaso'am hiahawes sasisasi epes amamba, pendaso'am. Amom mogofa'asa tekisi, pese'ama tekis. Amom mogofa'asa moni maisa mogatala waf mu'uli gavmani, pese'am. Dembami mamahoma manda' maol bu'wani nandahama epes sogasa'ma agof amamugufi, dao' pendafe' lafela amom. Ipa' sonehepa ma pegasa'ma agofa anom amam, dao' pesa'ma agof amamugufi.^o

Dei' si'i maina apa' magaila mu'uli Godi endilisi?

⁸Ipa' ina pewaola anof wiafa moni mais fotaoma anin epen, owa'i. Apa' anof wiaf atotof fondotaomapa atapif. Wiaf afamba ukup ipe'ipi pigapigaila anis sahin owan hiasi. Dei' main, epen mamahina okom mogamogaila anin epen daiani, anin nagaila mu'uli inimba endilisi. ⁹Apa' mogawa mu'uli inimba naga'ias na'amba na'i, “Ina' owa'i nehambombaga waf daso'amaifia ea' owa'i neha anis amam nematawa sog'a, owa'i nenda' wala, ea' ina a' kowolena ma hiahaom anis daindaiasi, owa'i.”

k 13:1 Ta 3:1; Pro 8:15; Jo 19:11 **l** 13:2 1 Pi 2:13-14; 1 Pi 3:13 **m** 13:3 Ro 12:19

n 13:6 Mt 22:21 **o** 13:7 Mt 22:39-40; Je 2:8

Mu'uli inimba naloma anin mu'uli mamahina nagapani wapani, kofagena inimba atin naga'i na'amba na'i, "Ina' okom mimila anis epes daias na'amba atin si'i okom magapoma ina' atina."^p

¹⁰Epen ami okom maimaila anin epen daiana nagaso'an opaf anini, inimba ina nanda' waf awafi ma anin, owa'. Epen inimba okom magamagaila anin epen daiani, anin naila mu'uli inimba endilisi.^q

Apa' mondafe' usi'ipa

¹¹Ae' a'i ipa' penda' waf afambai. Dei' main, ipa' pegawa ea' nogota ata'e dei' magapautai. Nogota ata'e ipa' pekwaaha koha pegesafel. Ipa' pegawa fowa' apa' mataga mahapifana dambaipa, nemaf afamba God na'i a' nowambelapa mogotanimai ata' fapani laogon, apa' dei' fataga felefele' kwasakwasala.^r ¹²Owamb ba'i a' hi'ilamb ea' felefele'ma lola negataga. Na'amba andeande'ma apa' mogakwaha waf hiafi awafi owambifi ma monda' waf usi'ifi alipifi fepe tatala'if si'i mofa' walitapa magahagasa wandafa waf awafi.^s ¹³Apa' mondafe' hilili' andeande' si'i epes sagape alipi. Ina mea' embel banagimbeli mohagamogaol ea' gikal mo'oh mi'i basef wandafifi, owa'i. Apa' owa'i monda' waf so'a waulafia monda' salamala basef awafi alugufi. Apa' ina' monda' migimigah mopa' ea' kowolapa ma hiahaom anis epes daiasii, owa'i.^t ¹⁴Apa' dei' pefa' Dembinai Jisas Kraisi ea' pindawisana si'i klos amamba lu'wami sanda' wandafami pefa'ana pepomana. Ipa' ina ukup pelapefe' ma pigaila nomonas awami alop atonaimi, owa'i.

Apa' ina mowaloga fe' esis sahin owani, owa'i

14 ¹Epen mamahina nagahapifanai, hapif ananini owa' banagania, inimba ipa' pese'an nelelemb ipe'ilimbi pefa'an pifi'i piwisi amam nematawa Kristen. Apa' ina pi'i pifitap pelomana basef mamimami, owa'i.^u ²Anin epen nahapifana banagen, na' gwa'aimi mamimami hiami. Apa' hapif anin epeni ina banagen, na'amba ina na' mafis maim, owa'.^v ³Ea' epen inimba naga' gwa'aimi mamimamii, ina okom iwanim mopoma epen inimba owa' nega' mafisia, owa'i. Ea' epen inimba owa' nega' mafisia ina okom iwanim mopoma epen inimba naga' gwa'aimi mamimamii nanda' waf awafi, owa'i.^w ⁴Ipa' ina pewaloga anin epen nanda' maola anin epen daiani, owa'i. I'i anin nivalutu banagena maol ananini o negewa, isimba maol anen Dembinai nugumafi anini atin. Anin atiasi nivalutu banagani. Dei' main, Dembinai ananinai atona la'ifinama nogowa' banaga anina nivalutu banagen.^x

P 13:9 1 Ko 13:4-7 **Q 13:10** Ef 5:14; 1 Te 5:6-7 **r 13:11** 1 Jo 2:8; Ef 5:11, 6:11

s 13:12 Lu 21:34; Ef 5:18 **t 13:13** Ga 3:27 **u 14:1** Jen 1:29, 9:3; Ro 15:7 **v 14:2** Kl 2:16

w 14:3 Mt 7:1; Je 4:11-12 **x 14:4** Ga 4:10

⁵Anin epen okom mapoma anef nemaf lu'uf a'owa' fikila' anif nimaguf hiafi. Apa' anin daian na'i nimaguf hiafi na'ambaif atin. Epes isimba hiasi atona atin sondameme'ma ukup asasipi atip andeande'. ⁶Epen mamahina okom magapoma anef nemaf be'ef a'owa'i, anin okom mandanda' ma Dembinai dei' nanda'am na'amba. Ea' epen inimba naga' gwa'aimi mamimamii, anin okom mandanda'ma Dembinai na'am. Dei' main, anin nanifela God na'as. Apa' epen inimba owa' nega' gwa'aimi mamimami hiamia, anin okom mapoma Dembinai, dei' nandaiwa'ma anis gwa'aisi. Inimba wapani nanifela God nihi'as.

⁷Apa' mogawa la'afena apa' ina anin epen nape nanda' maol naila okom ananiami atom, owa'. Ea' ina anin epen naila okom ananiami atom naga', owa'atin.^y ⁸I'i apa' mope, dao' monda' maola mogasa'ma agol Dembinaii. I'i moga', moga'ma mogasa'ma agol Dembinaii. Ea' i'i apa' mope namepa o moga', apa' Dembinaii atepa. ⁹Ea' isimba atis Kraisa naga' notanima ambal lapaona nosafel wapani ma nagape Dembinai ma epes isimba sagaga'i saloma isimba ata' sagape namisi.^z

¹⁰Dei' maina ipa' pagawaloga sahin owan ipe'isi ma fe' asasini a paga'ipas basef iwanifi? Na'ambai owa'i. Ipa' pegawa anaf apa' hiapai hi'ilapa a' mulutu gani God nope nogowaloga epes hiasima ea' nowalogapa ma basef lu'wafi.^a ¹¹Amamba si'i Baibel na'iam naga'i, "Dembinai naga'iam na'amba na'i, 'Ae' a'i endilisi atis, anaf epes hiasi sindiwa nembawa sotawa sonda' lotuma ae' hi'ilas, ea' sowalapa basef alihif si'if si'i ae' God endilisiwai.'^b

¹²Ea' apa' mogawa apa' hiapai atona atin anaf moga'ipa Goda waf hiafi kofagefa apa' manda'afi.

Apa' ina monda' anis hiahawes mohambombaga sahin owan, owa'i

¹³Ea' ipa' ina pewaloga sahin owan ipe'isi ma fe' asasini wapani, hapaimi. Apa' ukup pendanda' na'amba mi'i apa' ina monda' anef wafa monda' owamapa ape'inai nowa nonda' waf awafi, owa'i.^c ¹⁴Dembinai Jisaa ea' nawalipi egawa isimba. Ina anom hiahaom gwa'aisi mafis mais awasim dowadowaf, owa'. Okom epeni atom mandanda'ma anis maefah alugwisi, dei' hiahawes isimba awes alugwis.^d ¹⁵I'i ina' nea' anis maefaha waf afamba ine'ifi fehambombaga okom owamenai, ina' negawa, waf afambai ina' owa' okom mimila owamena, owa'. Kraisa naga' ea' ma nogowambilai owamena anamba. Ea' ina' owa'i nehambombagana ma gwa'aisi ine'isia.^e ¹⁶Ipa' ina penda' anef waf anis sahin owan Kristen sitilipa fenda' ukup asasipi iwanip, owa'i. I'i ipa' pi'i waf

^y **14:7** Lu 20:38; Ga 2:20; 1 Te 5:10 ^z **14:9** Mt 25:31-32; Ap 17:31; 2 Ko 5:10 ^a **14:10** Ais 45:23; Fl 2:10-11 ^b **14:11** Ga 6:5 ^c **14:13** Ap 10:15; Ta 1:15 ^d **14:14** 1 Ko 8:11-13
^e **14:15** Ta 2:5

afamba bu'wafi, ipa' ina penda'afa naep asasipi, hapaifi. ¹⁷Waf afamba saga' gwa'aisi embelafi, afambai ina kofagefa ma anamba God nagala'ambemagoma, owa'atin. Anamba waf usi'ifi hilili'i a opalef awanilifi faloma waf sonagahasafi atef fagapoma. Ambal bu'unai Godi naso'apai waf afambai. ¹⁸Epen ami nape nanda' maola Kraisi ma owa' nenda' anef waf fenda' Kristen ukup iwanipia, atiasi God okom bo'oma waf ananifi ea' epes wapani sogawa anin epen bu'wani/

¹⁹Dei' apa' mundaila waf hiafi fenda' apa' mogape opalef atelifi, a waf usi'ifi hiafi fegewa' banaga hapif esis sahin owani.^g ²⁰Ina' okom mopoma gwa'aisi atis ea' nehambombaga maol Godi, owa'i. Endilisi, hiahawes hiasi gwa'aisi bu'wasi. Apa' i'i ina' nea' anis maefaha sonda' anin epen nenda' waf awafi, dao' ina' wapani nanda' waf awafi. ²¹Ina andeande'ma nega' mafisi embel wain gwa'aisi mais, o nenda' anis maefah mamahisa sonda' owamena nogowa ma waf awafi, owa'i.

²²Okom ine'imi atom mondanda' neloma Goda hiahawes isimba sonda' owamena nogowai. Epen okom mogapoma anis maefah bu'wasi, okom ananiami ina manda' kotimana hiahawes gwa'aisi mais isimba, anin sonohan.^h ²³Apa' epen ami okom biafima nega'asa, kofagema ananiami atom. Dei' main, okom ananiami ina nahapilif banagen na'as, owa'. Hiahawes hiasi epes owa' sogahapifanaia sanda'ami, amamba awami.

Apa' mundaila okom Kraisi

15 ¹Apa' epes magahapifana banagambili, maol ape'ini inimba ma mogatopalopa epes isimba hapif owa' banaganiam. Esis ina la'ifisa sogofa' nimaniami asasimi, isimba apa' motopalopas mofa' nimaniami asasimi. Apa' ina mila nomonas ape'imi atom, owa'i.ⁱ ²Apa' hiapai atona atin monda' maol mondatopalopa epes sagape felefele'ma ape'i ma atiasi sogofa' waf bu'wafi sogataga banages.^j ³Apa' mogawa Kraisi wapani ina sonahana okom ananiami atom, owa'. Waf awafi fatagamana si'i Baibel na'iasa anen naga'i, "Epes sa'i basef findiwaefa ina' ea' basef ifimba atif fafi'i faso'ala ae'."^k

⁴Dei' main, basef hiafi fowa' amom manda'ef fagail Buki manda'efa fagawalipa apa'. Basef ifimba fegewa' banaga opalef ape'ilifi ma mugalutu banagepa mi'i endilisi atis God notopalopapa ma mogape andeande'. ⁵Apa' mofa' banagami ma God atona nanda'apa malutu banagepa magahapifana. Ae' a'i anen notopalopepa pila waf Kraisi Jisasi endilisi pigahapila nomonas atifis. ⁶Ama ipa' pegape opalef atifilif a malogof atogof pegasa'ma agol Godi, anen ahama Dembinai ape'inai Jisasi Kraisi.^l

f 14:18 Ro 12:18; Ro 15:2 g 14:19 1 Ko 8:13 h 14:22 Ta 1:15 i 15:1 Ro 14:19; 1 Ko 9:19; 1 Ko 10:24,33 j 15:2 Sam 69:9 k 15:3 Ro 4:23-24; 1 Ko 10:11 l 15:6 Ro 14:1

Krais natopalopa esis Juda saloma isimba owa' Judaisia wapani

⁷Ea' ipa' hipai ukup pindaima atin pendaso'asa nelelemb esis sahin owan si'i Krais wapani nagaso'apa nembel apa', ma epes hiasi sogasa'ma agol Godi lu'wagol.^m ⁸Ae' a'lipipa na'amba. Krais nafi'i nataga nanda' maol nape lafela nagatopalopa esis Juda. Anen nanda'as na'amba ma nigihimba'masa God naga'i basef endilisifi datimai. Basef fowa' nala' lapef nagaloma dembami bafapam akupam asasimi fandawalap alihif.ⁿ ⁹Krais nanda' maol inimba ma nogatopalopa esis sogololama Godi owa' Judaisia wapani sogogawa God na'ias esis uwahipisa sogasa'ma agol ananigili lu'wagol, si'i Baibel na'ias naga'i,

“Anaf ae' ewalapa basef i'i agol ine'igili
ma anis epes daias sogololama ine'i. Ea' ela
analef awalef efela agol ine'igili.”^o

¹⁰Ea' anif basef Baibeli faga'ias na'amba wapani fa'i,
“Ipa' epes pegelelama Godi, pendagala peloma esis wambota
ananisi.”^p

¹¹Ea' anif du'wanif fa'i,
“Ipa' hipai pegelelama Godi, pendasa'ma agol Dembinaii.
Pendasa'ma agol ananigili ma analef awalef.”^q

¹²Ea' Aisaia wapani na'ias na'i,
“Anaf anona aman notaga wambota Jesii.
Aman anamba a' notaga nope Dembinai ma esis
sogololama Godi numafias ea' sohapifana
si'i endilisi atis anaf anen notopalopas.”

¹³Apa' mogawa endilisi notopalopapa ma mogape andeande'. God anen kofagonama amamba. Dei' ae' a'i ipa' pihapifana nonda' dagala lu'wani neloma opalef awanilifi sogataga si'isa ipa'. Ea' a'i banagami Ambal bu'unai ananinai nonda'epa pegawa endilisi atis anaf piti banagami mogogala'i ananiami.

¹⁴Ipa' alipipai ae'ipai, opaf ae'afi egawa endilisi ma ipa' panda' waf fasifi dondol ea' pegawa gawa hiani naninani. Ea' ipa' ila ma pegaso'as nomonas bu'wasi sahin owan. ¹⁵Apa' anif basef anda'efa ipe'i ifimba banagafi a'owa' kwasakwasala. Apa' ae' ina ombal mahe andafa'mefa anda'ef, owa'. A'i esa'ma nomonas ipe'isi. Dei' main, God nati ae' uwahipiwi nase'e nembel ae' natopalope dowaf.^r ¹⁶Ea' anen nanda'e ape anda' maola Krais Jisasa enda' maol la'afena esis sogololama Godi owa' Judaisia. Anda' maol si'i amom mondolali ma Godi awalapa basef bu'wafi ananifi. Ae' a'i ifa'ai epes isimba sogololama Godi sifi'mai anen ea' Ambal

m 15:7 15:24 **n** 15:8 Ap 3:25; Ro 11:30; Sam 18:49 **o** 15:9 Ditu 32:43 **p** 15:10 Sam 117:1 **q** 15:11 Ais 11:10; Re 5:5 **r** 15:15 Ro 1:5, 12:3; Ro 11:13; Fl 2:17

bu'unai ananinai nonda'as sotaga epes Godi atis bo'wes hilili' egaso'anas anen si'i ofa anen okom mag'aian a'owa'i.

¹⁷Ae' ape sisihiwi aloma Krai Jisas ea' sonahe ma maol inimba anda'ana Godi.^s ¹⁸Krais atona nase'e banagami anda' maol inimba. Anen natopalope nanda'e banagewe afe' anda' maol inimba bu'wani awalipa esis sogololama Godi ma silana sogame' basef ananifi. Ae' andaiwa'ma iga'ipipa anif basef daif, owa'. Ifimba atif. ¹⁹Ambal bu'unai Godi nanda' hiahaom banagami nowa' banagae ma anda' banagami mamimami. Epes hiasi sati banagami amamba ea' same' basef Godi sailif. Dambadamba anda'am Jerusalem awalapa basef bu'wafi ma Krai afe' lauguni hi'alagon itambili itap lu'upa Ilirikam.^t ²⁰Maol inimba ae' okom ma'ian a'owa' ma egawalapa basef ifimba bu'wafi anagon esis owa' ata' sogogawa Kraisia. Ae' andaiwa'ma igi' efe' ewalapef feगतoma anif anom mali' mafe' magawalapafi, owa'.^u ²¹Ae' okom ma'ias si'i basef faga'ias, "Esis epes owa' anis sefe' soga'ipasa basefa aninia, anaf seme'efana sotolona. Ea' epes isimba owa' sogame' basefanaia, anaf seme'efana sogawana."^v

²²Fowa' anda' maol inimba agawalipasa basef Kraisi. Maol inimbai nahefa ufa'w ae'akwi nimaguf hiafi ea' ina afe'mago ipa', ata' owa'.

Pol na'i niti Rom ea' nefe' itap lu'upa Spen

²³Apa' dei' ae' maol ake na'a'e. Afagof hiagufi ae' okom ma'i a'owa' ma egafe'mago ipa'.^w ²⁴Isimba atis dei' a'i ata' ili' efo'o iti ipa' ma main, efe' itap lu'upa Spen. Ea' a'i ata' ipani nogota laota kwasakwasala endagala elomepa ma main, dao' ipa' petopalope pilutumi pehapone ufa'w kwagafe' Speni.^x

²⁵Apa' dei' a'i efe' Jerusalem enda' maol etopalopa esis amam nematawa Godi.^y ²⁶Esis Kristen sagape Masedoniai saloma Kristen Griki sa'i basef sandame'maef ea' ma sogowala hiahawes asasisi sonda' du'wanis sefe' Jerusalem, sogaso' esis amam nematawa Godi hiahawes akasi.^z ²⁷Endilisi ukup asasipi atip pa'ias ea' dei' sanda'as na'amba. Apa' ae' a'i esis sowaolamasa wiaf fotaoma esis Kristen sagape Jerusalemi. Fowa' esis Juda sali' soso'asa basef Godi ma sagatopalopa ambagof esis isimba sogololama Godi sagape Masedoniai Griki. Isimba atis dei' andeande'ma esis sogwamasa wiaf afamba esis Judia ma hiahawes sogatopalopa alopi. ²⁸Ea' ae' a'i ata' enda' maol inimba hi'ilan nili'. A'i ata' ese'asa hiahawes isimba bu'wasi esis Jerusalem hi'ilas ama main, ila ufa'w Speni efo'o ma ata' ili' itilipa.^a ²⁹Ae' egawa ea' nemaf afamba

^s 15:17 2 Ko 3:5 ^t 15:19 2 Ko 10:15-16 ^u 15:20 Ais 52:15 ^v 15:21 Ro 1:10-13

^w 15:23 1 Ko 16:6 ^x 15:24 Ap 19:21 ^y 15:25 1 Ko 16:1; 2 Ko 8:1; 2 Ko 9:2,12; Ap 24:17

^z 15:26 Ro 9:4; 1 Ko 9:11 ^a 15:28 Ro 1:11

egafe'mago ipa', atiasi hiahaom fasimi Kraisi a' mope si'ima ae' efo'o etagamepa.^b

³⁰ Apa' mahapifa Dembinai ape'inai Jisas Kraisi, ea' mogawa Ambal bu'wali Godi nasa'ma ukup ape'ipi ma pigapigaila esis sahin owan ape'isi. Isimba atis dei' a'ipipa dindinip a'i nomonas isimbai sosa'ma ipa' penda' maol numa'wini pegaloma ae' ma beten. Ipa' pendanda' betena God notopalope ae' ³¹ nogatagwahowe ma lagof anis epes Judaisi owa' sogahapifanaia. Ipa' pendabetena God nondanda' amam nematawa ananisi sagape Jerusalem sondagala ma maol inimba anda'ana agatopalopasani. ³² I'i God ni'i aho'me ai, efo'o etagamepa epe endagala a'owa' elomepa ata' epoma noma'w kwasakwasala. ³³ God anen kofagonama opaf awanafi. Ae' a'i anen nope nolomago ipa' hipai. Endilisi.

Pol na'ipasa nemaf bu'wafi amam nematawa hiasi

16 ¹ Ae' a'ipipa ma pigimafi Fibi andeande', ako'w haniti'mafa afa'ikwi kwanda' maol kwagatopalopa esis Kristen sagape Senkriai. ² Fibi kwape sisihi'wa Dembinai. Ea' ipa' pendaso' nelelemba ako'w si'i waf bu'wafi apa' amam nematawa Godi monda'afi. I'i ako'w nomonas nimanisa anis maefaha, ipa' pendatopalopa'w. Dei' main, ako'w kwatopalopa ae' wapani.^c

³ Ipa' penda'mas nemaf bu'wafi Akila naloma waulu'mana Prisila ea' pi'ipaso dagala ae'ani. Esis bias apa' mandao'oma manda' maol atin Kraisi Jisasi. Fowa' esis sandandombol endilisi ma sagatopalopa ae'. Nemaf afamba anis sa'i sogahe, esis ina ombal mahas, owa'. ⁴ Sa'i awi ma soga' sotopalopa ae' egape namowe. Ea' ina ae' atowe anifela esis bias, owa'atin. Esis Kristen hiasi fowa' sogolalama Godi wapani, sanifelis.^d ⁵ Ea' ipa' pise'asa nemaf bu'wafi ma dagala ae'ani esis Kristen isimba safe' sandakolas sagape ipat asaitai. Ea' pi'ipago Epainetus nemaf bu'wafi ae'afi anen alipunai ae'anai endilisi. Anen nali' nahapifa Kraisi nali'ma epes hiasi itap lu'upa Asia. ⁶ Ipa' penda'makwago nemaf bu'wafi Maria. Ako'w kwanda' maol numa'uni hiani ma kwagatopalopepa.

⁷ Ipa' pese'amo dagala neloma nemaf bu'wafi ae'afi ma amam amamba Andronikus noloma Junias, amom wapani Judaimi si'i ae'. Amom manda' kalabus magaloma ae'i. Amom aposel ma'i amom biam manda' maol bu'wani Godii. Amom mali'ma ae' mahapifa Kraisi.

⁸ Ipa' pi'ipago Ampliatusa nemaf bu'wafi ma dagala ae'ani. Anen alipunai ae'anai endilisi ma nagape sisihinama Dembinai.

⁹ Pi'ipago Urbanus nemaf bu'wafi ae'afi, anen nanda' maol atitin nagaloma ae'i ma maol Kraisi. Ea' pi'ipago Stakisa nemaf bu'wafi wapani. Anen alipunai ae'anai endilisi. ¹⁰ Ea' pi'ipago Apelesa nemaf bu'wafi

b 15:29 2 Ko 1:11; Kl 4:3; 2 Te 3:1 **c** 16:2 Ap 18:2,18,26 **d** 16:4 1 Ko 16:15,19; 2 Ti 1:15

ae'afi, anen agol gandawalapana nagaila Kraisi endilisi. Pi'ipasago dagala ma nemaf bu'wafi ae'afi ma esis sagape ipat atota Aristobulusi. ¹¹ Pi'ipago Herodiona nemaf bu'wafi ae'afi, anen Juda wapani si'i ae'. Pi'ipasago dagala ma nemaf bu'wafi ae'afi esis wambota atota Narsisusi sagahapifa Dembinaii. ¹² Pi'ipawago nemaf bu'wafi ae'afi ma Trifina kwaloma Trifosa, awo biawa wanda' maol numa'uni Dembinaii. Pese'akw nemaf bu'wafi ae'afi ma Persis, ako'w alipu'wi ae'akwi endilisi, kwanda' maol hiani ahifini ma Dembinai. ^e ¹³ Pi'ipago Rufusa nemaf bu'wafi anen epen bu'unai naloma ma'mana anani'wi ae' wapani egefala'w ma'mai. ¹⁴ Pi'ipasago dagala ae'ani ma nemaf bu'wafi ma Asinkritus, Flegon, Hermes, Patrobas, a Hermas, ea' esis Kristen sahin owan sape sagalomomi.

¹⁵ Ipa' pi'ipasago nemaf bu'wafi feloma dagala ae'ani ma Filologus noloma Julia, ea' Nereus noloma haniti'mana anani'wi, ea' Olimpas, soloma esis amam nematawa hiasi Godi sape sagaloma esisi.^f

¹⁶ Waf afamba apa' amam nematawa Godi, ipa' hipai atona atin pendagala pendaso'asa lagof esis sahin owan hiasi pindanifelis. Amam nematawa Kristen hiasi sagape na'ai sanda'mepago nemaf bu'wafi sandagalamepa.^g

Anis epes sanda' esis Kristen sandawal biafis sanda'as awes

¹⁷ Alipipai, ae' a'ipipa dindinipa silisolawi andeande' pegapoma anis epes sanda' waf awafii sanda' ipa' Kristen pendawal biafipa sogosambala basef ifimba ipa' pegefa'afi. Waf afambai esis sanda' epes hiasi sowa awes. Ipa' pese'as alafugah epes isimbai.^h ¹⁸ Esis ina sanda' maola Dembinai ape'inai Kraisi, owa'atin. Sagaila ukupa alop asasipi atopi. Sanda' basef atif ususihifi ma sambaso'ma opalef saga'i'ipa anis epes isimba owa' sogogawa anef waf bu'wafi awafi andeandi'i'a.ⁱ ¹⁹ Ipa' paila God, dei' epes hiasi sogawepa ea'. Isimba atis dei' ae' sonahema ipa'. Ae' a'i ipa' pendegawa waf bu'wafi endilisi, apa' ipa' ina ukup pendanda'ma waf awafi, owa'.^j ²⁰ God anen kofagonama opaf awanifi, nogota kwaia'uta ma nofa'asa Satan nogafe' lafela bo'wagah ipe'igahi. Ae' ahali' God andabetena Dembinai ape'inai Jisas Kraisi notopalopepa dowaf nope atapina nogalomopepa.^k

Anis epes sanda' nemaf bu'wafi sa'ipa esis Rom

²¹ Wandao'oma wanda' maol atini Timoti anen nasapa'ago dagala nemaf bu'wafi ma ipa'. Lusius naloma Jeson a Sosipater, amom Juda wapani

e 16:12 Mk 15:21 **f** 16:15 1 Ko 16:20; 1 Pi 5:14 **g** 16:16 Mt 7:15; Ta 3:10 **h** 16:17 Fl 3:19; Kl 2:4; 2 Pi 2:3 **i** 16:18 Ro 1:8; Mt 10:16; 1 Ko 14:20 **j** 16:19 Ro 15:33; Jen 3:15
k 16:20 Ap 16:1-2; Ap 19:22, 20:4

si'i ae', amom wapani masapa' nemaf bu'wafi ma ipa'. ²² Ae' Tertius, efa' malogola Pol anda'ago basef ifimba. Ae' asapa' basefa nemaf bu'wafi fafe'mago ipa' ma agol Dembinai ape'inai.^l ²³ Gaius nasapa'ago dagala ma nemaf bu'wafi ma ipa'. Anen numafi ae' Pol andeande' ipat ananitai, ea' numafi esis Kristen hiasi wapani safi'i sandakolas na'a'e. Erastus anen nanda' maola gavmani nugumafi otambai taun wambel ambalembai, ea' sahomapa ape'inai Kwartus, amom biam masapa'o basefa dagala bu'wani ma ipa'. ²⁴ [Ae' andabetena Dembinai ape'inai Jisas Kraisi notopalopepa dowaf numafipa ma nope nogalomago ipa' hipai. Endilisi.]^m

Apa' mondafela agol Godi

²⁵⁻²⁶ Apa' mondasama agol Godi lu'wagol. Anen la'ifinai ma nogowa' banagaip ma basef bu'wafi ananifi agawalapafi, ifimba basef bu'wafi faga'i Jisas Kraisi. Basef ifimba fowa' nimaguf hiafi ata' fape fandambaho', apa' dei' fataga alihifa basef ifimba fowa' amom profet manda'afi afa' wawalapef alihif. God nagape namona atapinai na'i basef dindinipa basef ifimba bu'wafi dei' fataga fandawalap alihifa misi'ah epes hiasi itap anamba hiagoma ma esis hiasi sogahapifana.ⁿ ²⁷ Anen atotona nogogawai endilisi. Apa' mondasama agol ananigili dondol lifilafi. Jisas Kraisi atona natopalopapa mondanda'as na'amba. Endilisi.

^l 16:22 1 Ko 1:14 ^m 16:24 Ef 1:9, 3:5,9; Kl 1:26; Ro 1:5 ⁿ 16:25-26 1 Ti 1:17; Ju 25